

### **ASO TOFI, 09 MATI 2023**

*Na toe faaauau Taulumaga a le Fono Aoao Faitulafono i le itula e 2:05 i le afiafi.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono. Ou te faamalulu atu i le tatou Maota aemaise lau afioga i le Sui Palemia, ona o faafitauli i a tatou faasalalauga i le 2AP, ua faafuasei ai ona faauilavea, a o talifuaitau lau afioga i mataupu sa laga e sui usufono mamalu mo tali a le Malo. Mo le silafia e le Maota ona o le faamalieina lava o manaoga mo faasalalauga tuusao o tatou Taulumaga mo le faafofoga mai o le tatou atunuu, o le mafuaaga lena na tatou vave malolo ai ae se i tau foia le faafitauli. Ia faafetai i le aufaigaluega a le 2AP mo galuega toe faaleleia, o lea ua toe lelei ai a tatou fesootaiga, mo le faafofoga mai o le mamalu o le atunuu.

E faataatiaese a tatou Taulumaga, o lo o saunoa talifuaitau le Sui Palemia i mataupu sa laga i tali a le Malo i le lipoti a le Komiti o le Vaega tau i le Va Fealoai.

Ma le faaloalo ou te tapa lau afioga i le Sui Palemia mo le faaauauina o lau saunoaga.

**Afioga Hon TUALA TEVAGA IOSEFO PONIFASIO:** Ia faafetai i lau afioga i le Fofoga Fetalai mo lou avanoa ua mafai na toe faaauau se faamatalaga. Ae momoli atu foi le faafetai i lau afioga, o lea ua maea le malologa, sa tali le sua i Taitai o le atunuu, e momoli atu ai le agaga o le faafetai i le faasiligamalosai ua tali ai le galala o le tino, e mafai ai ona toe faauau galuega a le Palemene.

E tuua pe fai le tatou malologa pe sa motu foi a tatou faasalalauga, sa taumafai lava se lagona e tuuina atu ma faataua le tulaga o leni Faalapotopotoga i ana galuega faatino ma ana galuega fai, aua se manuia o le atunuu. Sa faapena foi ona tau avatu se tuualalo i le tulaga e pei ona lauliliu i ai le tofa ma le faautaga i le aso, i fautuaga na tuuina mai mo le Taitaifono aemaise le Komiti. Ina ia faataua le tulaga o le toe silasila i faiga faavae, pe agai foi i se iloilogia o le tulafono, aua o le tulafono, o lo o faapena ona limataitaiina ai galuega faatino a leni Faalapotopotoga.

Ou te fia pai lau afioga i le Fofoga Fetalai i nisi o vaega na saunoa i ai sui usufono, ona e ese le taua foi o nei manatu. E na o se faalauaitele e tuuina atu i tafatafa ane o lau afioga i le Taitaifono e tauala atu i lau afioga i le Fofoga Fetalai.

Sa taua le saunoaga a le sui usufono mo Anoamaa, le tofa ia Lauofo, manaia le saunoaga a le Taitai o le Itu Agai. E tele lava mea na agai i ai le saunoaga a le Taitai o le Itu Agai, le tofa ia Lauofo, ae tasi lava le mea na ou pikia. Na saunoa lana afioga i le tulaga o le agavaa, o le agavaa e pei sa aumai faafesili, ona e matau atu, o lo o i ai vaega o le Tulafono, o lo o manino lava, e i ai e agavaa, ae o lo o i ai foi e e le o agavaa. E pei la o le upu lea o lea na agai i ai nisi o saunoaga, e pei ona saunoa i ai le sui usufono mo Satupaitea, lana afioga ia Lautafi, o ia foi lea sa avea ma Minisita o lenei Faalapotopotoga i le tulaga foi lea ia tau tatala te isi, ma ia tau talatala i tua le tulaga o e agavaa ina ia tele le coverage, ina ia mafai ona aafia ai ma nisi e le o mafai ona agavaa i le taimi nei, pe le o mafai foi ona resitala i lalo o le ACC.

O lea foi na saunoa i ai le sui usufono mo Sagaga 2, le fetalaiga ia Maulolo, i le tulaga foi lea o le tau talatala te isi i tua o le upega. Ina ia toe silasila le komiti faatonu, pe e i ai nisi mafuaaga e tatau ai ona agavaa nisi e le o agavaa i le taimi nei. O se faataitaiga e pei ona saunoa i ai Leaana le sui usufono mo Safata, sa ia faataua le tulaga o le aufaifaatoaga. O le aufaifaatoaga, o i latou nei o lo o taumafai e atinae ia aiga, e le o totogiiina ni a latou levy i le ACC ma tulaga faapena. Ona o lo o galulue lava latou ia latou faatoaga. Ae a i ai ni faalavelave faafuasei, e le agavaa i lalo o le tatou polokalame. Aepeitai o i latou nei o lo o atinaeina aiga, o lo o i ai foi le faamoemoe o le Malo, o i latou nei e faamoemoe i ai le tatou export ina ia lava ia fua o faatoaga e auina atu i fafo, aua foi le tupe e sau i totonu o le tatou atunuu, o isi ia o vaega taua.

Na saunoa foi le sui usufono o Safata, i le tulaga o le au faifaiva. E i ai nisi o lo o galulue i tai i le sami, o lo o faapena ona agai atu i vaafagota, ia ua lava foi le silafia i le Palemene nei. E i ai lava faalavelave faafuasei e tutupu i le gataifale, ma faapena ona maliliu ai nisi foi o tagata o lo tatou atunuu. O le faataua o lea tulaga, e pei foi ona ou taua i le taimi muamua, o lea e galulue nei tagata mo le atinae o le atunuu, e le gata i aiga, a o le ekalesia aemaise foi o afioaga. O le latou sao i totonu o le atunuu o lena ua outou silafia, o lo o atinae le atunuu, aepeitai e le o agavaa i lalo o lenei polokalame. E pei o le tulaga lena e faataua ai foi, ou te iloa o lena ua oo lava i ai le Ofisa Sili o Pulega ma le Faalapotopotoga, ae tau lava ina toe faailo ma faaiila le tulaga lea, e faatauaina e le tatou Palemene.

Ua taua le tulaga o le paū o faalavelave, e pei ona saunoa i ai sui usufono mo Anoamaa 1, o se agaga e maua ai foi le loto faafetai, ona o lea ua maua le faamatalaga o lo o faaitiitia lava le sau i lalo o faalavelave tutupu faafuasei. Atonu o le isi lea galuega lelei ua fua mai, e tauala mai lea i faasalalauga a le Faalapotopotoga o lo o faatino nei ma nisi latou polokalame. Ou te iloa o lo o i ai foi nisi o vaega, e pei foi o le tulaga na saunoa i ai le sui usufono mo Sagaga 2, e ao ona tatou silasila totoa po o le a le mafuaaga ua ala ai ona sau i lalo ia le tulaga o faalavelave faafuasei. E ese le taua o le vaega lea.

Ou te iloa o le Faalapotopotoga lenei o le ACC o le Taui o Faalavelave Tutupu Faafuasei, e i ai foi a latou paaga, e i ai le vaega o Leoleo, e i ai foi le vaega o le MCIL, e i ai le vaega o Leipa, Pisinisi ma Alamanuia, o lo o galulue faatasi soosoo tauau, ma isi lava faalapotopotoga e pei o le FESA. Ua ou le maua le tele o isi faalapotopotoga, ae ese le taua o le vaega lea. O lo o i ai foi ma le LTA faapea foi le Soifua Maloloina ma le Asosi o Tausi Soifua. Atonu o isi ia paaga o lo o galulue faatasi ma le tatou Faalapotopotoga lenei.

Na taua foi e nisi o sui usufono le pulega o lo o i ai le avamalosi ma le tulaga o le faaitiitia o le faatauina atu o le avamalosi, ua le talafeagai lona malosi ma fuafuaga o le tulafono o lo o taoto nei. E pei ona silafia e le atunuu, o lo o i ai faasalalauga o lo o tuuina mai e le Matagaluega o Leoleo ua faaitiitia le tulaga o faalavelave, po o mataupu tau solitulafono ua tuuina atu i le Ofisa o Leoleo, ona o le mafuaaga ua faaitiitia le taumafa o le ituaiga avamalosi lea e pei ona i ai. atonu o le isi lea tulaga lelei.

E ao pea ona faafetai, a o faafofoga mai le Taitaifono o le Komiti faatonu aemaise foi o le Ofisa Sili o Pulega o lenei Matagaluega, e fia fai paaga foi le tatou pulega o le avamalosi. Atonu foi e i ai se sao o lenei pulega i le sini autu o le tatou Faalapotopotoga.

O le tulaga e pei ona taua i le tautalatalaga i tua o le upega. Lea e faapea a luasefulu afea le tama sa galue, ae faafuasei ona maliu pe maliu foi, e maua e tina le sefuluono afe. A galue foi le tina, atonu e maua e le tina le luasefulu afe, ae maua e le tama le sefuluono afe. E pau lava le mea e agai i ai se fautuaga foi i Taitaifono, ona e le faapea e na o le tama, ma le tina o lo o i ai le fanau. A maliu le tina e tausi e le tama le fanau. A maliu foi le tama e tausi e le tina le fanau. E pei o le isi lena pea e pei e faalautele te isi lava le silasila i le tulaga lea.

O le tulaga lava e avatu ai le fautuaga, aua le faaleleia atili o le auunaga lau afioga i le Taitaifono, ina ia toe silasila i le Tulafono. E leaga o le Tulafono, o i ina e aumai ai le pule faasoa, e mafai ai ona silasila ma taitaiina ai le pulega i le tulaga o le faasoa lea.

O lo o i ai, po o se faataitaiga, o le taimi nei o lo o i ai nisi o manua, e pei o faalavelave faafuasei e tulai mai ai manua tuga, e ono aafia ai le soifuaga o le tagata e oo lava ina ua maliu. O tulaga o manua po o aafiaga e le mafai ona toe faaleleia, ae le o lava le taui o lo o i ai. Ia ou te le tio i le tulaga faapea po o faasinosinolima i le pulega ae o le Tulafono e mafai ai ona tatala te isi le vaega lea ina ia lelei ma fetauti ma talafeagai le taui mo le tagata ua i ai ni manuaga ogaoga faapea ua aafia ai le tagata, ua le gata i le tagata a o lona aiga, o lana fanau, ma se sao foi o lenei tagata i totonu, e ala i ona tiute tauavae e pei ona tofia ai i nisi o galuega.

E pei o le tulaga lava lea, e na ona tuu atu i tafatafa o le Ofisa Sili o Pulega faapea le komiti faatonu, e tauala atu i le Taitaifono o le Komiti, ia o le tuualalo lena, aua ne i aveesea le faataua o lenei Faalapotopotoga, aemaise o le faataua o lenei Tulafono, o le puipuia

lava o le atunuu. E aoga foi o lea ua tagofia e le Palemene i le aso, o le tofa ua faaalua ma le faautaga ua folasia, o le a faufau ai lo outou sa.

E manatu lau afioga i le Fofoga Fetalai, e le toe faaumia se faamatalaga, ae tatou ave pea le moto e pei ona tatou masani ai, “E sili lava le puipua nai lo le togafitia.” E le galo lena faaupuga, o le manulauti lena, o le matafaioi foi lena o lo o taumafai le tatou Faalapotopotoga nei e uunaia, aua le saogalemu o le puipua, aemaise o le manuia lautele o le tatou atunuu. Ia faafetai tele i lau afioga i le Fofoga Fetalai, manuia le tatou Fono.

**FOFOGA FETALAI:** Malo faafetai i le saunoaga malamalama ma le saunoaga faalaeiau, aemaise foi le saunoaga faalototele a lau afioga i le Sui Palemia, aua foi lena Faalapotopotoga taua a lo tatou atunuu. Malo mo le saunoaga faafetai.

Ou te tapa lau afioga i le Taitaifono mo le lafo.

**Afioga LAUMATIAMANU RINGO M. PURCELL:** Ou te faatu le lafo, ina ia faamaonia e le Fono Aoa le P.P. 2022/2023 Nu 15, Lipoti a le Komiti o le Vaega Tau le Va Fealoai i le P.P. 2020/2021 Nu 8, Lipoti Faaletausaga a le Faalapotopotoga o Tau i mo Faalavelave Faafuasei mo le tausaga Faaletupe 2019/2020.

*Faaluaina e le sui usufono mo Aana Alofi 3 ma le sui usufono mo Aana Alofi 1.*

*Na faamaonia le lafo.*

**FOFOGA FETALAI:** Ou te tapa lau afioga i le Sui Palemia, mo le lafo mo le Tali a le Malo.

**Afioga Hon TUALA TEVAGA IOSEFO PONIFASIO:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le Tali a le Malo i fautuaga a le Komiti o le Vaega Tau le Va Fealoai e pei ona ou tolaulauina.*

*Faaluaina e le Minisita mo Galuega, Felauaiga ma Atinae Eeseese ma le Minisita mo le Soifua Maloloina.*

*Na faamaonia le Tali a le Malo.*

**P.P. 2022/2023 NU. 16 LIPOTI A LE KOMITI O LE VAEGA TAU  
LE TAMAOAIGA I LE P.P.2020/2021 NU. 126, MA LE  
P.P.2021/2022 NU. 41, LIPOTI FAALETAUSAGA A LE OFISA O  
FUAINUMERA FAAMAUINA MO TAUSAGA FAALETUPE  
2019/2020 MA LE 2020/2021**

P.P.2022/2023 NU. 79, TALI A LE MALO I LE P.P.2022/2023 NU. 16, LIPOTI A LE KOMITI O LE VAEGA TAU TAMAOAIGA I LE P.P. 2020/2021 NU. 126 MA LE P.P.2021/2022 NU. 41, LIPOTI FAALETAUSAGA A LE OFISA O FUAINUMERA FAAMAUINA MO TAUSAGA FAALETUPE 2019/2020 MA LE 2020/2021 - ILOILOGA

**FOFOGA FETALAI:** Tulai mai lau Afioga i le Taitaifono o le Komiti o Vaega Tau Tamaoaiga.

**Afioga NIUAVA ETI L MALOLO (Taitaifono Komiti Vaega Tau Tamaoaiga):** Lau Afioga i le Fofoga Fetalai ou te faatu le lafo, *Ina ia faautagia e le Fono Aoa le Lipoti a le Komiti o le Vaega Tau le Tamaoaiga o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mamalu mo Falealili 2 ma le sui usufono mo Aana Alofi 1.*

*Na faamaonia le lafo.*

**FOFOGA FETALAI:** Ou te tapa lau Afioga i le Taitaifono mo le taulauluina o Sailiiliga, Fautuaga ma Iugafono a le Komiti.

**Afioga NIUAVA ETI L MALOLO:** Lau Afioga i le Fofoga Fetalai, e manatu o lea ua maea ona ta le tavai e fai ma too, tosi le faatu masina aua le agaga o le Atua pei ona i ai i le taeao ua fano. Ae lau Afioga ile Fofoga Fetalai ae lei oo foi se faamatalaga e faaleo le Lipoti a le Komiti e muamua ona ou faapoipoi vagana vaeane le faafofoga foi o Samoa. Ou te faaleoina ai i lo'u tulaga i totonu o le Faigamalo o loo tulai aemaise o le vaega faaupufai, matou te manatu matou te le fole i le mole le faaaloaloga aemaise foi o faatumatie i le momoli mai o le Afioga i le sui mamalu, o le Itumalo Vaimauga. Ou te tulai ai e faaleo le agaga o le faafetai paia i le Itumalo le Afio o Alo o Sina, le Afio le Matua, Afio le Fuiafale o Salevalasi, Afio le Usoalii o le Gafa ma Aiga, Susu Alo o le Malietoa, Alalatai le Tuisamau le Faletolu ma le Vainalelepa, Alalatai foi Sa Taga ma Fuata, Taga ma Salaitua o le Launiusaelua ma le Lamoana na Fagatau. Paia aua Faatoiaomanu o Malae ma Maota e Afifio ai le Tofa i le Matua, afifio le Aiga Sa Malietoa. O la outou faaaloalo maualuga e ala i le momoli mai o le Afioga i le Sui Usufono, ua tumatie lea lava ua tau i le Niusina. O la outou faaaloalo ua mafaulu ua mafatotoga, momoli mai le agaga o le faafetai i le Afioga i le Ao Mamalu o le Malo ma lana Masiofo. Momoli mai le agaga faafetai o le Afioga i le Sui o le Fono Sui Tofia mo le faaaloalo maualuga, momoli mai foi le agaga o le faaaloalo i le Afioga i le Taitai o le Itu Agai i le Itumalo.

Faafetai tele i la outou faaaloalo maualuga, o le latou faamanuiaga ia manuia tele lau Susuga i le Sui Usufono mamalu. Ia maua nisi aso se tele aua lau tautua i totonu o le faigamalo aua le tauaveina o le tofa i le

Itumalo. Lau Afioga i le Fofoga Fetalai ona ou oo mai lea e tusa ai ma le Lipoti o le Komiti o le vaega tau le Tamaoaiga P.P 2020/2021 Nu 126 Lipoti Faaletausaga a le Ofisa o Fuainumera Faamauina mo le Tausaga Faaletupe 2019/2020 ma le P.P 2021/2022 Nu 41 Lipoti Faaletausaga a le Ofisa o Fuainumera Faamauina mo le Tausaga Faaletupe 2020/2021.

O taualumaga a le Komiti. E 2 Lipoti Faaletausaga a le Ofisa o Fuainumera Faamauina na tuuina mai e le Fono Aoao i le Komiti mo le Iloiloina o le Lipoti Faaletausaga mo le Tausaga Faaletupe 2019/2020 ma le Lipoti Faaletausaga mo le Tausaga Faaletupe 2020/2021. O le aso 08 Mati 2022 na feiloai ai le Komiti ma le Ofisa mo le iloiloina o a latou Lipoti Faaletausaga. E tusa ai ma Iloiloga a le Komiti na faamauina ai e leai se eseese tele i totonu o Lipoti Faaletausaga e 2 sa tuuina mai. E le gata i galuega faatino o matafaioi na mafai ona ausia ae faapea foi ma luitau sa feagai ma le Ofisa. O le mafuaaga lea na manatu ai le Komiti e ao ona talanoaina faatasi Lipoti Faaletausaga e 2 i le taimi e tasi ina ia faigofie ona faatusatusa le eseese o matafaioi ausia ma galuega faatino o tausaga faaletupe e 2 o loo iloiloina o leni lipoti. Ua mafai ai ona tuuina atu ia saililiga a le tatou Komiti na faamauina ma Iloiloga sa faatinoina ua faailoa ai sini autu o fuafuaga autasi a le Ofisa.

#### **AOTELEGA O SAILILIGA.**

O lipoti Faaletausaga e 2 sa iloiloina, o lo o faailoa manino ai matafaioi na mafai ona ausia e le Ofisa i totonu o ia tausaga faaletupe e tusa ma manaoga o loo faataatia mai i ana sini autu.

#### **Sini Autu 1: Ia faaleleia Faamaumaga mo le Fausiaina ma le Mataituina o Faiga Faavae Talafeagai mo le Atunuu.**

##### **Taiala e fuatia ai le tulaga lelei o fuainumera ma faailoilo:**

E oo mai le tausaga 2019-2022 o loo faauau pea e le Ofisa le vaai ma le tuufaatasia o faamaumaga tau tupe i luga o le itulau o upega tafailagi talu ona tatalaina le auunaga i le 2017. O se auunaga o loo galulue faatasi le Matagaluega o Tupe ma le Faletupe Tutotonu. O nei faamaumaga e aoga e tali atu ai ini mataupu manaomia mai paaga faavaomalo ae ose faiga foi ina ia faamalosi ai le galulue faatasi ma le felagolagomai o Faalapotopotoga uma Faavaomalo, o faaogaina nei faamaumaga mo le sailia o ni taiala e limataitaiina ai le faatinoina o lea vaega o le auunaga.

##### **Faamaeaina o le suesuega o tupe maua ma tupe faaalu a Aiga 2018:**

O le suesuega o Tupe Maua ma Tupe Faaalu a Aiga, o se suesuega e tai 5 tausaga ma faatino. O le Tausaga Faaletupe 2020/2021 na faamaeaina ai lea suesuega, sa amata faatinoina mai le 2018 ma ua tuuina atu i le Kapeneta le Lipoti mo se faamaoniga. O leni suesuega o loo aoina mai

ai faamaumauga e faatatau i Tupe Maua ma Tupe Faaalu a aiga taitasi mo le tapenaina o ni taiala ma faavae mo le mataituina o le tamaoaiga o le atunuu.

**Sini Autu 2: Ia faaleleia faamaumauga ina ia mafai ona tali atu i manaoga e le gata ile atunuu o le Pasefika ae faapea foi le Lalolag atoa**

**Lipoti lona lua o Auaunaga Ofofua mo Samoa (2nd Second National Voluntary Reports):**

Na faamauina le tele o le sao o le Ofisa i le tuufaatasia lea o faamaumauga ma tulaga uma mo le poloketi mo Samoa o se poloketi na faaiuina ma le manuia ma o Iulai i le tausaga 2020. Na tuuina atu ai lea lipoti i le Faalapotopotoga o Malo Afaatasi, fausiaina ma le tuufaatasia o le taiala o faailoilo mo le saogalemu o Samoa i lona taimi muamua. O lenei poloketi o loo galulue faatasi ai le Malo e tauala mai ile Ofisa o Fuainumera Faamauina ma le Faalapotopotoga o Malo Soofaatasi le UN.

**Fausiaina ma le tuufaatasia o le Taiala o Faailoilo mole Saogalemu o Samoa i lona taimi muamua.**

Iloiloina o faamaumauga i tulaga faailoilo mo le soifua lelei ma le saogalemu o tagata Samoa o Mati ile tausaga 2021 na faalauiloa ai lea lipoti.

O le auga ma le faamoemoe o lea poloketi, o le toe iloiloina le ao tulaga o faamatalaga o faailoilo e talafeagai mo le puipuiga lautele o Samoa ma ia faia ni taiala e faaleleia ai le tulaga o le aoina mai o faamaumauga sao ma atoatoa e lagolago ai polokalame faifaipea, e faaitiitia ai le mativa ma aafiaga o tulaga lamatia o le tamaoaiga mai le suiga o le tau.

**Sini Autu 3: Faatupulaia le faamalieina o le mauaina o faamaumauga o lona tulaga lelei ma le sao atoatoa e tali atu ai i manaoga o i latou e faaogaina ia faamaumauga:**

**Faamanatuina o le aso faapitoa mo fuainumera i le lalolagi:**

Na faatautaia e le Ofisa le sauniga ia Oketopa 2020 e faamanatu ai le taua o la latou matafaioi i le aoina mai o faamaumauga o fuainumera mo Samoa. Sa valaaulia ai latou paaga oloo galulue faatasi e molimauina ia faamanuiaga uma na mafai ona ausia e le Ofisa talu ona faavaeina. O se molimau taua lea i le tulaga o le siitia ma le faaleleia o le faatinoina o le auaunaga ofoina o le Ofisa aua le tali atu i ana paaga e le gata i Samoa nei ae faapea foi atunuu i fafo.

**Galuega mo le tusigaigoa o tagata ma fale 2021, lisi pepa o faamatalaga o tagatanuu, faamanuiaga a le Malo (Stimulus Package):**

O Oketopa i le tausaga 2020 na faatautaia ai le lisiina o suafa o le mamalu o le atunuu mo le tusigaigoa. Sa fai faatasi ma le aoina o faamaumauga faavae mo le faatinoina o le pepa o faamatalaga o tagata Nu'u National ID. Ae le gata i lea o le tufatufaina atu o le tai \$50 o faamanuiaga mai le Malo mo le faamai o le Koviti 19. Sa mafai foi ona aoina ai ma faamaumauga tau aafiaga o le tamaoaiga o Samoa ona o le Koviti 19 mo le faalapotopotoga o Malo Aafaatasi. E ui i faafitauli na feagai ai ona o aafiaga o le faamai ae sa mafai lava ona faataunuuina ma le manuia lea faatinoga. O faamaumauga foi sa mafai ona aoina mai e le Ofisa sa faasoa atu i le Matagaluega o Soifua Maloloina aua le faatinoina o le tuiga tele a le atunuu.

**Sini Autu 4: Siitia le tulaga o agavaa male silafia o le aufaigaluega.**

**Filifilia Samoa e fai ma sui o le Pasefika i le Komisi maualuga o Fuainumera Faamauiina a le Faalapotopotoga o Malo Aafaatasi:**

O Oketopa i le tausaga 2020 na avea aloaia ai Samoa e fai ma sui o le Pasefika i le Komisi maualuga o Fuainumera o Malo Soofaatasi. O se matatia maualuga lea ile tausaga faaletupe 2020/2021 mo le Ofisa. O se taimi muamua foi ua maua ai se atunuu mai le Pasefika lea avanoa, na fai ai le Afioga ia Aliimuamua Malaefono Taua, o lea sa avea ma Ofisa Silio Pulega e fai ma sui o lo tatou atunuu.

**Avanoa e auai atu ai le aufaigaluega i fonotaga ma aoaoga:**

E tele avanoa sa mafai ona auai atu ai le aufaigaluega e fai ma sui o le Ofisa i fonotaga ma aoaoga mo le siitia o lo latou agavaa. O se avanoa foi e faaleoina ai mataupu e uiga i le faatinoga o galuega a le ofisa. O le tasi o nei avanoa, e aofia ai le aoaoga sa faatinoina i luga o upega tafailagi e faatatau i le Fuaina o Soligatulafono ma Faamasinoga faatino e faaaoaga ai Suesuega a i latou na aafia ma sa faatinoina e le UNODC (United Nations Office on Drugs and Crime) i le tausaga e 2019. Na maua foi le avanoa e auai atu ai le Vaega o Tupe a le Ofisa i le faatinoina o suesuega ma iloiloga sa feagai ma le Faalapotopotoga o Tupe a le Lalolagi (IMF Article IV Mission) sa faatinoina i le masina o Mati 2020.

Ona oo mai lea o sa matou faamatalaga i Fautuaga.

**FAUTUAGA**

I le maea ai o iloiloga, e fautuaina le Malo ina ia:

1. Toe tagai i le faaleleia o le polokalame faatekonolosi mo faamatalaga (information technology system) o lo o faaogaina e le Vaega o Resitala, ina ia mautinoa le lelei o le faatinoina o le



auaunaga. E le gata e manaomia le toe faafou, ae ia tagai i se faiga e mafai ai ona maua se polokalame e faatino i totonu o Samoa, e faafaigofie ai le faatinoga o galuega manaomia.

2. Faatumauiina pea le galulue soosootauau ma nisi o Matagaluega a le Malo e pei o le Matagaluega o Tupe, Matagaluega o le Soifua Maloloina, Matagaluega o Leoleo, Matagaluega o Tiute ma Tupe Maua, Matagaluega o Faatoaga ma Faiga Faiva, Matagaluega o Aoga, Faletupe Tutotonu o Samoa ma isi Faalapotopotoga Tumaoti ina ia mautinoa e mafai ona tali atu i manaoga o faamaumauga moomia i taimi uma e manaomia ai.
3. Tutiluliloa vaega moomia mo le faamaeaina o le poloketi o le Pepa o Faamatalaga o Tagatanuu. O se poloketi taua ua tele tausaga o faagaioi ma ua tataua ona tino mai.
4. Faamalosia le faatinoina o ni aoaoga mo le aufaigaluega ina ia siitia tomai ma agavaa i le faatinoina o galuega faatekonolosi ma le faaogaina o mea faigaluega ua tapenaina e faatino ai galuega.
5. Saili se nofoaga e mafai ona tuu faatasi uma ai Vaega o le Ofisa ina ia faigofie le faatinoina o ana galuega. Na faamauiina le faigata o fesootaiga ma le faamalieina o le faatinoga o auaunaga i nisi o taimi ona o le vavamamao o nofoaga e galulue ai Vaega taitasi. O lea e manaomia ai le silasila totoia o le Mal oi se faiga e foia ai lea faafitauli.

#### **IUGAFONO:**

I le maea ai o iloiloga a le Komiti, na faaiugafonoina ai e fautuaina le Fono Aoa ina ia faamaonia le P.P.2020/2021 Nu.126, Lipoti Faaletausaga a le Ofisa o Fuainumera Faamauiina 2019-2020 ma le P.P.2021/2022 Nu.41, Lipoti Faaletausaga a le Ofisa o Fuainumera Faamauiina 2020-2021.

Ma lou faaaloalo tele lau Afioga i le Fofoga Fetalai.

**FOFOGA FETALAI:** Malo faafetai i lau Afioga i le Taitaifono mo le tolaulauina auiliili o la outou Lipoti. Malo tapena, faafetai foi, malo galulue.

Ia ou te tapa lau Afioga i le Minisita mo le tolaulauina o Tali a le tatou Malo, Honourable Leota Laki.

**Afioga Hon LEOTA LAKI LAMOSITELE:** Faafetai atu i lau Afioga i le Fofoga Fetalai e tusa ai foi ma le avanoa ua tuuina mai. Ou te tulai atu ma le faaaloalo e tuuina atu Tali a le Malo e tusa ai ma le Lipoti a le Komiti o le Vaega o le Tamaoaiga agai i le Lipoti Faaletausaga a le Ofisa o Fuainumera Faamauiina mo tausaga faaletupe 2019/2020 ma le 2020/2021.

**Fautuaga 1:**

Toe tagai i le faaleleia o le polokalame faatekonolosi mo faamatalaga (information technology system) o lo o faaaogaina e le Vaega o Resitala, ina ia mautinoa le lelei o le faatinoina o le auaunaga. E le gata e manaomia le toe faafou, ae ia tagai i se faiga e mafai ai ona maua se polokalame e faatino i totonu o Samoa, e faafaigofie ai le faatinoga o galuega manaomia.

**Tali:**

O le resitala o pepa fanau, o le a faaaogaina e le poloketi o Pepa Faamaonia e faatino ai le resitala autu. E i ai le faamoemoe o le Ofisa o se avanoa lelei foi lea o le a mafai ai ona toe faaleleia atoa le resitala o tagata fananau, maliliu faapea ai ma e faaiipoipo.

**Fautuaga 2:**

Faatumauina pea le galulue soosootauau ma nisi o Matagaluega a le Malo e pei o le Matagaluega o Tupe, Matagaluega o le Soifua Maloloina, Matagaluega o Leoleo, Matagaluega o Tiute ma Tupe Maua, Matagaluega o Faatoaga ma Faiga Faiva, Matagaluega o Aoga, Faletupe Tutotonu o Samoa ma isi Faalapotopotoga Tumaoti ina ia mautinoa e mafai ona tali atu i manaoga o faamaumauga moomia i taimi uma e manaomia ai.

**Tali:**

O le a faaaauu pea ona faataua e le Ofisa o Fuainumera faiga faapaaga ma Matagaluega ma nisi o Faalapotopotoga a le malo e pei ona sa faatino i nisi o Matagaluega ma Faalapotopotoga a le Malo. O se tasi lea o vaega faamuamua ua faataua tele i le Taiala mo le Atinae o Fuainumera 2022-2026, ma e mautinoa le tele o lona sao i le faalauteleina ma le faamausaliina o faamaumauga e tali atu ai i manaoga o le atunuu, ae faapea foi i maliega faava o Malo e pei ona sainilima ai le Malo o Samoa. O le sini autu foi lea o le fuafuaga mamao a le Ofisa o Fuainumera, ina ia faamalosia pea faiga paaga, aua le aoina ma le tuufaatasia o faamaumauga o lo o faaaogaina e le malo, pisinisi ma tagata lautele.

**Fautuaga 3:**

Tulituliloa vaega moomia mo le faamaeaina o le poloketi o le Pepa o Faamatalaga o Tagatanuu. O se poloketi taua ua tele tausaga o faagaioioi ma ua tataua ona tino mai.

**Tali:**

O le taimi nei ua maea faatalatalanoaga ma le atunuu lautele e tapena ai le Tulafono Tau Faaofi o Pepa Faamaonia. O lo o ua maea foi ona tuuina mai le Ata Muamua o le Tulafono mai le Kamupani sa galulue ai, ma ua faagasolo nei tapenaga mo le tuuina atu i le Ofisa o le Loia Sili mo le iloiloaina, e tusa ai ma taiala ma faiga faavae o galuega a le

Malo. E faamoemoe o se taimi e le o toe mamao ona tuuina atu lea i le Palemene mo le talanoaina. A pasia loa le Tulafono, ona faigofie loa lea ona faagasolo isi vaega uma o lenei poloketi e pei ona faataitia.

E toe faaopoopo atu la i le tali lea i le tali lata mai, o lea ua taatia nei i le Ofisa o le Loia Sili le Tulafono i le taimi lenei, ma o lo o talia le ata mulimuli lava o le Tulafono lea. Ma o le tuualalo lea o lea ua momoli atu i le Ofisa o le Loia Sili, po o a fa outou, ae ou te lagona ua outou fesoasoani mai ina ia aumai le tatou Tulafono, ona o lo o i ai le naunautaiga o le tatou Matagaluega e fia faaoo atu le tatou Tulafono lea e fia pasia i se mea o Iuni. A tuai tele o Iulai.

**Fautuaga 4:**

Faamalosia le faatinoina o ni aoaoga mo le aufaigaluega ina ia siitia tomā ma agavaa i le faatinoina o galuega faatekonolosi ma le faaaogaina o mea faigaluega ua tapenaina e faatino ai galuega.

**Tali:**

O le a faaauu pea ona ave le faataua a le Ofisa o Fuainumera i le tapueina ma le faalauteleina o tomā ma agavaa faapitoa o le aufaigaluega, aemaise i le vaega o le faaaogaina o metotia ma auala faatekonolosi mo le aoina, tuufaatasia ma le faalauiloina o fuainumera aua faaiuga fai a le atunuu ma ana paaga. E le gata ina maua fesoasoani i aoaoga i le fefaasoaiga i totonu lava o le Ofisa, ae o lo o tele nisi o avanoa o fesoasoani mai ai a tatou paaga mai fafo, aemaise i Faalapotopotoga o Malo Aufaatasi ma le Faalapotopotoga o Tupe a le lalolagi o lo o ofoina ia auaunaga. O lenei atinae o se atinae e faataua pea e le matagaluega ae faapea foi i ana paaga uma.

**Fautuaga 5:**

Saili se nofoaga e mafai ona tuufaatasi uma ai Vaega o le Ofisa ina ia faigofie le faatinoina o ana galuega. Na faamauina le faigata o fesoataiga ma le faamalieina o le faatinoga o auaunaga i nisi o taimi ona o le vavamamao o nofoaga e galulue ai Vaega taitasi. O lea e manaomia ai le silasila totoa o le Mal oi se faiga e foia ai lea faafitauli.

**Tali:**

O se tasi o faafitauli ua leva ona feagai ma le Ofisa o le le maua o se nofoaga se tasi e tuufaatasi uma ai. E famoemoe lava i le faatofalaiga a le Malo, e maua ai se nofoaga e mafai ona tufaatasia ai lenei Ofisa, ina ia faigofie ai le faatinoga o ana galuega.

Ma le faaaloalo lava. Faafetai.

**FOFOGA FETALAI:** Malo faafetai i lau Afioga i le Minisita o Fuainumera Faamaumauina a le tatou atunuu, o lea foi ua faafogafoga le Maota i le Tali a le tatou Malo. Ia malo lava le galulue.

Ia o le avanoa lenei o se tasi o sui usufono o le Maota e fia saunoa. Ia o lea ua mua mai foi le sa o le Afioga i le Taitai o le Itu Agai. Ia, lau Afioga i le Taitai o le Itu Agai.

**Tofa Hon LAUOFO FONOTOE NUAFESILI PIERRE**

**LAUOFO:** Faafetai i lau Afioga i le Fofoga Fetalai. E faafetai foi i le Taitaifono o le Komiti mo le Lipoti maeaea. E momoli foi le faafetai i le Afioga i le Minisita i le momoliina mai o Tali a le Malo. E faamauina foi le faafetai i le Pulega a le Matagaluega mo le galuega tele sa nafa ma i latou, e faapea foi galuega eseese ua faamauina i totonu o le Lipoti Faaletausaga a le Matagaluega, e pei la o le tatou national ID. E momoli atu ai le faafetai. O lea ua maua i le saunoaga malamalama a lau Afioga i le Minisita o lo o galulue ai nei le Ofisa o le Loia Sili mo le faamaeaina o le Tulafono Tau Faaofi i le Maota ina ia pasia ai ma faatulafonoina le tatou National Identification. O se poloketi taua tele le poloketi lenei ua tuanai atu foi nai tausaga o taumafai mai aua se tuufaatasia o tagata o le atunuu ma ia tuufaatasia i se nofoaga e tasi a latou faamaumauga, tulaga o latou details uma ma asofanau, o nofoaga faapea ma isi faamatalaga taua, e aoga tele i so o se mea e manaomia ai mea o ID, aemaise lava i totonu o le atunuu ma pisinisi ae faapea foi pe a malaga e faaaoga foi i atunuu i fafo pe a fealuai i atunuu mamao.

E momoli atu ai le faafetai i le Matagaluega i lea foi galuega tele. E tusa ai ma le fautuaga muamua, etaua lava le galulue faatasi o isi o Matagaluega ia ma le tatou Matagaluega lea o Numera Faamauina, ona e manaomia lava le sao, manaomia le sao o faamaumauga. Aua o le mea lea e tupu i i, e matauina, e i ai isi pepa fanau, ma pepa maliu ma pepa faaipoipo e aumai e le o sao atoatoa faamatalaga o lo o aumai ai, aemaise lava i pepa fanau. O lo o i ai le tulaga lena e le o sao le nofoaga na fanau ai. o isi tamaitai na fanau i le falemai ae aumai le pepa fanau fai mai na fanau i tua. E faapena foi isi vaega eseese, o lea e matauina e i ai foi isi pepa fanau, o tamaiti na fananau i Amerika Samoa, omai iinei o laiti, ou te le iloa po o faapefea ona fai isi mau fesootaiga ae fai pepa fanau Samoa, e faapea e faaaoga ai i inei. O le mea lea ua tupu ua matutua ae, ua toe fia foi i Amerika Samoa, ua tau saili pepa fanau Amerika Samoa. E tele lava vaega faapea, e taua le toe silasila i ai o le aufaigaluega ina ia sao faamaumauga, faatasi ma le falemai, na aumai i le lipoti.

Ia faafetai i le Taitaifono ma isi Matagaluega faapea le galulue faatasi ma le Matagaluega i Amerika Samoa faapea isi atunuu. Aemaise tatou paaga lata mai, o Ausetalia ma Niu Sila. Aua e i ai le mea lea, e pei e foliga o lo o tulai mai, i tina ia o lo o fananau a latou tamaiti i Niu Sila ma Ausetalia, e le o ni tina tagatanuu o Ausetalia po o Niu Sila. A fananau la i atunuu ia, e fananau mai a latou fanau, e le o ni sitiseni Niu Sila po o ni sitiseni Ausetalia. E i ai ni pepa nofomau o le tina, ona le iloa pea po o tagatanuu Niu Sila po o se tagatanuu Samoa. O le mea lea

e i ai ona e agavaa lava le sitiseni Samoa ona o le tina o le Samoa, ona maua ai lea o le sitiseni Samoa ma le tusifolau Samoa. E tasi lena mataupu ou te talitonu o se mataupu na faava-o-Malo i le level lea e i luga, i tulaga faapea o tatou fanau ia, o lea ua matauina ua i ai nai fanau faapena i totonu o le atunuu.

O lea ua matauina i le tatou lipoti mai le tausaga 2020/2021 ua pau i lalo, ia le aofai o tamaitai fananau mai. Ua pau i lalo le aofai o tagata malilili, pau i lalo le aofai o tagata faaiipoipo. O le mea lea e fesili atu ai i lau afioga i le Taitai komiti, po o le a se mafuaaga ua faapea ai. E po o le mea ua faaletonu le faamaumuina o faamaumauga, po o le mea ua le lipotia mai i totonu le tele o nei tulaga o lo o tulai mai. Aua e faafe luaselau sefulufa ia tamaiti na soifua mai i le 2019/2020. Ae oo mai i le 2020/2021, e na o le toluafe fituselau fitusefulu fa. Ia e faapena, pau i lalo le aumaliliu pau i lalo le fuainumera o le... pau i lalo... masalo ua le fia faaiipoipo nisi, ae ua manaia ai le nofonofu ai faapena.

Lau afioga i le Taitaifono o le isi mea lea i le tatou lipoti, faafetai e tele lava vaega aoga ia i latou servey. O lea e momoli atu ai le faamalo i le Matagaluega. Le servey lea e fai e le Matagaluega lena, e tasi lea servey o le tatou export ma le tatou import, aua o lea ua matauina, e tele ia o le trade in balance lea e matauina i totonu o le lipoti lena. ua maualuga tele le tatou import ae laititi le tatou export. E taua foi mea faapea aua le tulaga i le tatou tamaoiga ma le fefaatauaiga o oloa, ona e tatau ona silasila lelei i ai, aua tupe maua a lo tatou atunuu, o le tulaga lena e pei ona matauina.

O le isi foi servey lea na aumai e le tatou Matagaluega, e faafetaia ai le tatou Matagaluega i le faitau aofai o tagata ma le vaevaaina i lalo i vaega i tausaga, age groups. O lea e matau atu o le sefululima tausaga i le luasefuluiva tausaga ua pau maualalo, o lona uiga pe sao lau matau lau afioga i le Taitaifono, e pei o i, i tausaga ia, o lea e toatele ai tagata o le atunuu o lo o malaga i fafo, e le gata i galuega faavaitaimi, ae faapea le agai i fafo ua maua nofomau i atunuu i fafo, ona o le sailiga o se manuia mo aiga, o faamuli atu. Ae o le vaega lea, e taua tele mo i tatou, e... le malosi. O so o se atunuu tau atiaae, e manaomia tele le age group lea, o le toatele o le aumalolosi lea e i i, e fesoasoani i le tulaga o le atinaaga o le atunuu.

Lau Afioga i le Fofoga Fetalai, ua pau ai i i, ni manatu faafetai mo le avanoa.

**FOFOGA FETALAI:** Malo faafetai mo lou sao foi e tusa ai foi ma le lipoti a le komiti, aemaise o le tali a le Malo. Tulai mai lau afioga i le sui usufono mo Aiga i le Tai.

**Afioga AUUAPAAU MULIPOLA ALOITAFUA MULIPOLA:** E faafetai i le Taitaifono mo le lipoti malamalama faafetai foi i le tali mai a le Sui Minisita. Ae e fia ave se faamamafa a lou sui usufono e tusa ai ma iloiloga, o lo o taua ai le poloketi o le National ID. O le fautuaga

lona tolu lea e sau i le Komiti, mo le silafia e le tatou Palemene. O lo o faapea mai e tulituliloa vaega manaomia mo le faamaeaina o le poloketi, o le pepa faamaonia tagatanuu o Samoa. O se poloketi taua ua tele tausaga o faagaoioi, ma ua tataua ona tino mai.

O lau fesili faamolemole i le afioga i le Taitaifono, o lea ou te vaai atu i le lipoti, e tele lava ina aafia vaega o le lipoti mai le isi Paeaiga ua tuanai, Paeaiga XVI. O lau fesili la, e fia faatauaina o upu ia, “ua tele tausaga o faagaoioi ae le tino mai.” A o le faagaoioiga e faagaoioi lava i tupe. Ona ou toe see mai lea e le vaega lea e tali ai le Malo, lea e faapea mai. O le taimi nei ua maea faatalatalanoaga ma le atunuu lautele, e tapena ai se Tulafono Tau Faaofi o pepa faamaonia nei. O lo o ua maea foi ona tuuina atu mai le ata muamua o le Tulafono mai le Kamupani sa galue ai, e tusa ai ma taiala ma faiga faavae o galuega a le Malo. O le fesili la, e le o atagia mai i i, o lea ua maea ona faatino le galuega lea, a o lea faatoa fai le process? O le process lea e ave ai ma toe faai mai i se Tulafono Tau Faaofi? E pei o lea faatoa ave le vaega lea o le Tulafono e gaoio mai le Loia sili, a o lea ua uma ona faatino le galuega, e pei o upu ia e tusia mai. E tele taimi na alu ai, ae le i tino mai.

O lea la ou te fesili atu i le tulaga lea, pe o le mea ea o le mea lea ua tupu, ua mulimuli faatino le galuega lea ma le process ae ua uma ona faatino le faagasologa o le National ID lea. e faamalulu atu ona o lea ou te iloa lau afioga i le Minisita e le o le taimi tonu lea, faapea foi lau afioga i le Taitaifono, ae o le fesili lava fia malamalama. E leaga o lea faatoa taua faatoa fai le process lea e ui mai i se pili, a o se Tulafono Tau Faaofi, ae o lea ua gaoioi, ua gaoioi le tupe a le Malo e faatino ai. Ma lou faaaloalo lava e fia maua ai faamaninoga. Faafetai.

**FOFOGA FETALAI:** Malo faafetai. Malo faasoa i le sui mamalu o le Aiga i le Tai. Lau afioga i le Taitaifono, o lea ua maua atu ua leai se isi sui. Faamalie atu lava lau afioga i le Taitaifono, o lea e mataua atu o lea e tulai mai le sui usufono mo Falelatai ma Samatau.

**Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau):** Faafetai i lau afioga i le Fofoga Fetalai mo le avanoa. E puupuu lava se fautuaga a lenei itumalo, ona o le taua tele o le Matagaluega lenei. E muamua ona momoli atu le agaga faamalo ma le faafetai i lau afioga i le Taitaifono, faapea le Komiti na nafa ma le iloiloina o le lipoti faaletausaga a le tatou Matagaluega. E momoli le faamalo ma le faafetai i lau afioga i le Minisita, e tusa ai ma tali a le Malo e pei ona fofogaina.

Ae o le a tuusao se fautuaga a lenei foi itumalo. O le taua ia o le fautuaga lona lua lea e tuuina mai e le Komiti, o lo o faapea mai, e faaaauu ona galulue faatasi le Matagaluega ma nisi o Matagaluega ma Faalapotopotoga. Ae manatu lenei itumalo, e pei e... o le taua ia o le galuega a le Matagaluega lenei. E le na o nisi o Faalapotopotoga ma Matagaluega, ae manatu e aafia atoava lava Matagaluega ma

Faalapotopotoga, e oo foi i le mamalu lautele o le atunuu, e tatau ona galulue faatasi ma fai sao, ina ia tulai mai le galuega lenei i se tulaga siitia ma maualuga. Aua o le taua o faamaumauga nei, e faaoga so o se Faigamalo e fua i ai lona atinae, ma ana galuega e fai. O le taua la lenei o le sao o faamaumauga nei e maua mai i tusigaigoa ma galuega a lo tatou Matagaluega lenei, ina ia mafai ona fesoasoani tele i le Malo, mo le faapolokalameina o ana atinae ma le itu e tatau ona agai i ai fuafuaga ma faiga faavae a lo tatou Malo.

E avatu se tala faaitaitai, i le taimi o ou galue i le Faalapotopotoga o le Malosi faaeletise, sa agai le komiti faatonu ma le pulega e tau fai se tau e aupito sili ona faamama avega mo tagata matitiva, tagata limavaivai. E le i tau lau o lea faamoemoe, aisea? Aua foi na avatu le talosaga i tai i le Pule faatonu, ae fesiligia e le Pule faatonu pe faafefea ona iloa e le Faalapotopotoga, o tagata nei ua matou avatu, o tagata e vaivai lo latou tamaoiga ma matitiva. O le mea lea e faatau ai e lenei itumalo, a o tatou i ai i le Matagaluega lenei. E tatau ona matua galulue faatasi le Matagaluega lenei, ma Matagaluega uma a le Malo ma Faalapotopotoga. O le isi itu taua i le galulue faatasi lea, e mafai ai foi ona share ia cost i le faatinoina o tusigaigoa lea e fai nei. Ae ia maua uma le information e manaomia, e se Malo aemaise o le tatou Malo, e faaoga e le Malo mo ana fuafuaga mo le atinaeina. E pei o se faaitaitaiga lata mai lena o lea ou te avatua, e molimoli atu ai le feau taua, o le taua o le galulue faatasi, ma ia sao faamaumauga o lo o tuuina mai.

O le isi faaitaitaiga lata mai lea e i ai nei, o lea faatoa uma atu nei le faigapalota a Vaimauga 3, a o lea e saua i la outou faafofoga ma sa matou faalogo. E toetiiti lava luaafe ia tagata e le i palota. Ae o le fesili, o sao nei faamaumauga pe leai. E le gata la i le Vaimauga 3, ae faapena uma lava itumalo. O lea e molimauina i faiga palota i tausaga uma e fai ai palota. E leai lava se itumalo e uma ifo le faigapalota, e latalata le numera o tagata palota i le lola o le itumalo lea e aumai i le palota. O le mea lea e ese le taua o le galuega a le Matagaluega lenei mo le agai i le lumanai. O se tuualalo la a lenei itumalo, e le gata e faatau le galulue faatasi, ae ia silasila totoa le Malo po o a indicators po o information o lea e manaomia, e tatau ona collect mai uma i le taimi lea e tasi. Ina ia faamalieina ma ia accurate ia faamaumauga e pei ona tuuina mai, ona e taua tele i le Malo.

E pei o se matou tuualalo lea lau afioga i le Fofoga Fetalai, ae faafetai mo le matou avanoa.

**FOFOGA FETALAI:** Malo faafetai, i le faasoa a le sui usufono mamalu mai Falelatai ma Samatau. Ia tulai mai le sui usufono mo Alataua Sisifo, le sui tamaitai.

**Afioga ALIHALEMANU MOTI MOMOEMAUSU ALOFA TUUAU:** E faafetai i lau afioga i le Fofoga Fetalai mo so matou

avanoa. Ae o sina sao foi ona ou te talitonu au ia, o le Ofisa pito i taua lea. E ala ona pito i taua, i mea tau faamaumauga ma mea tau tupe, aua foi o le Ofisa lea latou te aoina uma maia faamaumauga ia e faamoemoe i ai le Ofisa o Tupe, o Matagaluega uma a le Malo, aua a le lelei faamaumauga ia, e le mafai ona fai faamaumauga a Matagaluega uma lava. O le taua lena i lenei sui usufono, o le mea foi lena i sou lava manatu, o le Ofisa pito i taua lea, i mea tau faamaumauga ma la latou matafaioi lea, e fua iai ia tatou tonu fai ma faaiuga e fai. Aua a le lelei le aumaiga o faamaumauga e le mafai ona faatino uma a galuega a Matagaluega o le agaga faafetai lau Afioga i le Taitaifono mo le Lipoti auiliili faapea le tali mai a le Malo. Ae e fia faataua foi e lenei sui usufono le fautuaga lona 2 lea, ona o le fautuaga lea lea ou te talitonu e aofia ai foi ii i faamaumauga nei e ao mai, aua le galueaina o le tatou GDP lea e faaoga e Matagaluega o Tupe (Central Bank) ma Matagaluega uma e aofia i le fuaina o le tamaoaiga. E fuafua i i le Ofisa lea ma ana fuainumera ia e ao mai. O le ao mai o fua o faaeleeleaga o loo maua i totonu o le atunuu o fua foi o faaeleeleaga ma o tatou exports o avatu i fafo ona ua taugata tele le tau o le soifuaga. Ou te nofo lava ma ou mafaufau poo sao ea fuainumera ia e aumai.

O la'u talosaga la o le tuualalo foi sei tagatagai pe le tataua ona fai se tatou special audit o faamaumauga nei o loo faaogaina mo le fuaina o le tamaoaiga lea e faamoemoe iai le tele o Matagaluega, le Central Bank ma isi Matagaluega lea e aofia i le fuaina o le tamaoaiga ona o le taugata ma le 12% lea ua aumai nei. O lea na taua e sui le taua foi o faamaumauga i pepa fanau aemaise le population census, pe le tataua ona aemaise le tamaoaiga le fia ave iai le faamuamua a lenei sui. Se i tagatagai a i tatou vaega na e faaoga poo talafeagai, se i fai se special audit poo fetau i lenei vaiata, ia latou metotia ma faamaumauga na e faaoga e fua iai le tamaoaiga.

O nisi o sui ia sa laga ou te talitonu e au faatasi uma i se lagona ma se tuualalo lea faapopopo atu ai i la tatou fautuaga Nu 2, o se tuualalo ma se manatu. Manuia lenei afiafi ma le tatou fonotaga.

**FOFOGA FETALAI:** Malo saunoa i lau afioga i le sui usufono mamalu. Ia lau afioga i le Taitaifono.

**Afioga NIUAVA ETI L MALOLO:** Lau Afioga i le Fofoga Fetalai, ae le i tali atu e tusa ai foi o le faafesili i le paia foi o le tatou Maota nei. E lagona a le agaga faafetai i tulaga foi i fautuaga e pei ona tuuina mai ai manatu o lea e faafofoga maua, ususi a faavaasavili le faafofoga foi i Afioga, le aiga Minisita aemaise foi Ofisa Sili o Pulega o le Matagaluega ma le Matagaluega mo fautuaga. E agai ai luma le tulaga, e moni ma faamaoni e taua tele le Matagaluega lenei tulaga o le aoina mai o faamaumauga na faafesili le Afioga Taitai le Itu Agai tulaga i le sao ma le atoatoa o faamaumauga o le tulaga lea i le ala lea o le



tatalo o le Matagaluega i le tuuina atu lea o faamaumauga sao faataitaiga tai pei o mea nei o pepa fanau.

O le ala lena o le tatalo o le Matagaluega e aumai le pepa mai uta i le Matagaluega o le Soifua Maloloina e manaomia ai le faamaumauga sao o le alo ma le fanau pe a faapea na fanau, le ala lena e taua ai e pei ona fautua atu i le fautuaga 2 lea e manaomia ai lava le galulue soosootauau o Matagaluega nei, ina ia mautinoa le moni le sao atoatoa o le faamaumauga e tuuina atu ile Matagaluega, e tapena ai ana vaega nei o lona uiga la e leo se galuega e fai toatasi a le Matagaluega. E manaomia le tulaga o le lelei o famaumauga ma le sao atoatoa e tuuina i le Matagaluega e aumai foi la le pepa fanau e faamalieina le tulaga i faamaumauga o loo iai tulaga i pau maualalo o faamaumauga. Sa manino lava le faataotoga o le finagalo o le tali mai a le Matagaluega i le tulaga foi lea i le aafia ai i vavao i le taimi foi o le faamai, na ala ai na pei e faapena le tulaga foi o le pau maualalo o vaega o faamaumauga e pei ona iai i lipoti.

Lau Afioga i le Sui Fofoga Fetalai sa fesiligia le vaega lea i le National ID, o le auga lava lea e tasi, taimi lea o le faamauina le tele o vaega manaomia ia ma le taofia ai o le vavao o le Koviti sa faatino ai le vaega lea ma tuai ai le faagaioiga o galuega a le Matagaluega e pei ona iai i totonu o le fautuaga. E momoli le agaga faafetai sui foi o Aiga le Tai, e moni pei e talua ia tulaga foi i fautuaga e pei ona aumai i le taua o le galuega lea o le soosoo tauau ma le galulue faatasi o Matagaluega e faataua le galuega a le Matagaluega e lagolagoina le finagalo o le Afioga i le Sui Tamaitai o le Alataua i Sisifo tulaga lea o le manaomia o le toe faatinoina o se suesuega i tulaga foi ia o le population o le atunuu. E matau mai le taimi a o faigaluega e oo mai a lenei taimi e lei oo a i se 200 ma ona tupu e 200 a le faamaumauga o lona uiga e 20 tausaga, a o lea a e masalo pe 200,000 foi le population o le atunuu o lona uiga e manaomia tele se suesuega e faatino i le vaega o loo i ai le moni ma le faamaoni o faamaumauga.

Ae faafetai tele mo fautuaga e pei ona fautua mai ai le Sui Tamaitai o Alataua i Sisifo lea faalogologo atu foi afioga i Minisita aemaise foi le Ofisa Sili o Pulega o le Matagaluega mo fautuaga foi o lea aumai ai se tali maumau tutu aua foi le agai i luma o le galuega fai a le Afioga foi i le Ofisa Sili o Pulega, aemaise o le Matagaluega lau Afioga i le Fofoga Fetalai. O le taumafai atu lea e tali fuaitau foi e tusa ai foi o faafesili e pei ona faataoto ai lipoti nei e lua. Manatu o se laolao lelei e momoli ai le agaga faafetai i le Afioga foi i le Ofisa Sili o Pulega aemaise foi o le Matagaluega, faapea foi o le Paia i le Matagaluega i la outou galuega faigata. E le faigofie la outou galuega aua foi le tautuaina o le tatou atunuu, e le mafai foi ona faagaloina so matou lagona e manatua ai pea le tautua matavela a lea foi auauna sa aveva ma Ofisa Sili o Pulega e pei foi ona iai i totonu o le tatou Lipoti lenei, le Afioga ia Aliimuamua Malaefono Taua Taloga Faasalaina ua faailagi le folauga. Ae le mafai ona faagaloina lea faletua foi sa tautua matavela i totonu o le tatou

Malo, e le mafai ona galo. E momoli ai le agaga faafetai i galuega lelei lea lava e soosoo tauau ai ma le foi ua pale mai i le galuega a le Matagaluega e faatino la latou tautua i lo tatou Malo.

Ia o sa matou toe tulai atu lea lau Afioga i le Fofoga Fetalai, manuia le fonotaga.

**FOFOGA FETALAI:** Ia malo faafetai saunoa lau afioga i le Taitaifono. Ou te tapa lau Afioga i le Minisita.

**Afioga Fuaava Suluimalo Amataga (Aleipata Itupa i Luga):** Lau Afioga i le Fofoga Fetalai pe maua se avanoa.

**FOFOGA FETALAI :** Ia se i saunoa mai se tasi foi o sui o le komiti.

**Afioga FUAAVA SULUIMALO AMATAGA:** Faafetai lava i lau Afioga mo le avanoa ona e pei o lo'u tulai atu, ona o le matou Komiti ia lea ua saunoa le matou Taitaifono. Ae i ai se manatu o le matou galuega e tausoa. E i ai nisi o tulaga e pei ona laga ai finagalo o le Maota aemaise a tulaga lea le National ID faamaumauga lea o tagatanuu o Samoa lea sa fesiligia e le Afioga i le Sui Fofoga Fetalai o le sui mai le Aiga le Tai, lea ua saunoa le matou Taitaifono tasi lea vaega e pei ua tausaga ai o faagasolo ona feagai tonu a le vaitaimi lea o le 2019, fai le Misela 20 oso mai le Koviti. A o taimi tonu lea o lea faagasolo ae i le faalauteleaga o le tulaga lea atonu foi o lea alala mai sui o Matagaluega o le National ID e le o se galuega nao i i le vaega o Faamaumauga. O le National e aafia uma ia Matagaluega o le fuafuaaga o lea faamoemoe e mafai a ona faaoga lo'u ID e tala ai lau NPF. E le pei o le mea le iai nei e tele a na o le ID o le avetaavale pei se mea e link uma iai tele o Faalapotopotoga ma Matagaluega a le Malo e faaoga i le falemai ma tulaga faapea o le amataga foi la ona sa iai se taimi sa ta lavea ai pei o le umi foi lea e amata ai consultation ma le taimi lea foi lele faiga o le design ia ma le brainstorming. Leaga o lea e i ai le vaega o le faafesili pe ua muamua le process a lea faatoa aumai le tulafono e aumai i totonu o le Maota.

Ae pei o le tulaga lea o le process lea e design e fai ai se faavaa foi lea e fua foi iai le tulaga o le tulafono e tapena ai o le tulafono e tapena mai ai ona fai ai lea o le implementation ma tulaga foi lea ua faatino le vaega lea. Ae ua lava tapena le Matagaluega lea e gafa ma le tuufaatasiga uma o details mai Matagaluega ma Faalapotopotoga eseese e ala ai ona taua le National ID, lona uiga e faaoga soo se mea mo tagatanuu o Samoa, o le fesoasoani atu lea mo le matou Komiti, faafetai.

**FOFOGA FETALAI:** Ia malo saunoa i lau Afioga i le sui usufono mamalu o le Komiti ia se i tulai mai lau Afioga i le Minisita.

**Afioga Hon LEOTA LAKI LAMOSITELE:** Faamalo faafetai mo lo'u avanoa. E momoli atu le faafetai i le Komiti aemaise foi le Taitaifono o le Komiti e tusa ai foi ma le lipoti ua uma ona faamatalaina faapea foi ma le faamalamalamaga o nisi o mataupu sa laga. Ou te talitonu foi o lene ua taatia i ina le aotelega o le lipoti e pei ona tolaulauina mataupu taua, a la e faalogologo atu ai ma le totoa. E lagona lava le agaga faagaetia i finagalo autasi lea o le taumafai e tuufaatasi Matagaluega i le taumafaiga lea o le atinae lea o le National ID, aemaise foi le toe faaleleia atili o le Matagaluega o Fuainumera aemaise lava i le tulaga lea ua oo nei iai le Matagaluega, i le toe faamaopopoga o fuainumera ma tulaga faapena ua manaomia ai atamai faapitoa atili ina ia mafai ai ona latou aumai faamatalaga fuainumera i se auala e faafaigofie ona malamalama ai ia tagata. Ou te iloa o se tulaga e faafetai ai i le aufaigaluega ina ia taumafai atili e faaloloto la outou suesuega ma aooaga ina ia mafai ona latou faatino ia galuega. Ona o lea ua iloa nei e ese le taua o fuainumera, pei o le matau atu i ai i le mea lea, a sau a fuainumera o la e lelei e leai ma se isi e popole. Ae sau loa o leaga ona faapea loa laia, ua matou le talitonu poo faapei i poo lelei le fuainumera lenei e ao, pei o le natura a lea o tatou a o le tulaga lea ua iai le Matagaluega i lau matau iai, ua lelei atoatoa.

O le tele ia o suiga ma le lelei o le aumai o fuainumera o la e mafai na faamalamalama uma a mafuaaga e ala ai ona galugalu, po o le a le mafuaaga e alu i luga alu i lalo fuainumera, e iloa ai i ina le tulaga o lo o taatia ai so o se taumafaiga lava po o se Faalapotopotoga po o le atunuu, o le mea lava e tasi, e ao lava ona tau tilotilo totoa pea ina ia mafai ai ona mataitu po o a ni auala e faaleleia ai se mataupu ua faaletonu, ia po o le faaleleia atili ai se faamaite ina ia mafai ai ona manuia ai nisi po o le atunuu atoa i le vaega faapea. Ou te iloa o le mea taua lene e faataua ia tatou ina ia aoga ia tatou le faaaogaina o fuainumera.

O la'u toe tatalo atu lava i le Ofisa o le Loia Sili ona o lo o faatalitali atu pea le tatou Ofisa mo le final draft o le tatou Tulafono Tau Faaofi lea. E pei ona maua mai, ua fai lava si umi o faagasolo mai ona o mafuaaga eseese. E tele lava o lea ua outou silafia ma ou iloa foi le mafuaaga. Ae le o toe popole la i le mafuaaga i le taimi lenei, o lea o le a tatou agai atu i luma ina ia faatino le faamoemoe pei foi ona i ai se isi o sui o le Komiti na fai muamua, ua uma ona fai fai le design ae toe omai i tua toe fai atu le Tulafono. O lea la ua fai atu le Tulafono ua le ofi i totonu o le design, ia o lea la ua toe faasao ai le Tulafono. E pei o isi na mafuaaga o lea ua ala ai ona faapea le tatou mataupu. Seiloga la e uma ona faasao le Tulafono, ona faatoa toe faasao faalelei lea o le design ina ia fetau lelei ai lea o mataupu ia e lua. O lea e avatu ai le tuualalo i le Ofisa o le Loia ina ia mafai ona pe a aumai le tatou Tulafono Tau Faaofi lea, ia ona toe faasao faalelei lea o le design ina ia fetau lelei ai lea o mataupu ia e lua. O le mea lea e avatu ai le tuualalo i le tatou Ofisa o le Loia ina ia mafai ona a aumai le tatou Tulafono Tau

Faaofi lea ona faapena ai loa lea... aua e leai lava ma se isi o tatou e le o naunau, aua pei o le National ID, o le magaala lea e fetai uma ai Matagaluega pe a oo i le taimi e manaomia e faatino ai latou fuafuaga fai ma galuega faatino.

Ia o se faamatalaga lea. E momoli atu le faamalo i le Ofisa Sili o Pulega o le Matagaluega faapea foi le afaigaluega mo le Lipoti. Ia faamanuia mai le Atua i lenei taumafaiga. Faafetai.

**FOFOGA FETALAI:** Ou te tapa lau Afioga i le Taitaifono mo le lafo.

**Afioga NIUAVA ETI L. MALOLO:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le P.P.2022/2023 Nu. 16, Lipoti a le Komiti o le Vaega Tau le Tamaoaiga i le P.P.2020/2021 Nu. 126 & P.P.2021/2022 Nu.41, Lipoti Faaletausaga a le Ofisa o Fuainumera Faamauina mo Tausaga Faaletupe 2019/2020 & 2020/2021.*

*Faaluaia e le sui usufono mo Faasaleleaga 4 ma le sui usufono mo Falealili 2.*

*Na faamaonia le lafo.*

**FOFOGA FETALAI:** Ou te tapa lau Afioga i le Minisita mo le Lafo i Tali a le tatou Malo.

**Afioga Hon LEOTA LAKI LAMOSITELE:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o le Vaega Tau le Tamaoaiga, e pei ona ou tolaulauina.*

*Faaluaia e le Minisita mo le Soifua Maloloina.*

*Na faamaonia Tali a le Malo.*

**FOFOGA FETALAI:** Malo le onosai i le tatou Maota.

**P.P.2022/2023 NU.17, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU. 110 & P.P.2021/2022 NU. 11, LIPOTI FAALETAUSAGA A LE FALEMELI O SAMOA MO TAUSAGA FAALETUPE 2019/2020 & 2020/2021**

**P.P.2022/2023 NU. 41, TALI A LE MALO I LE P.P.2022/2023 NU. 17, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU.110 MA LE P.P.2021/2022 NU.11, LIPOTI FAALETAUSAGA A LE FALEMELI O SAMOA MO TAUSAGA FAALETUPE 2019/2020 MA LE 2020/2021 – ILOILOGA**

**FOFOGA FETALAI:** Tulai mai lau Afioga i le Taitaifono o le Komiti o Tupe Maua ma Tupe Totogi.

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai ou te faatu le lafo, *Ina ia faautagia e le Fono Aoa le Lipoti a le Komiti o Tupe Maua ma Tupe Totogi o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Lefaga ma Faleaseela, sui usufono mo Aana Alofi 1 ma le sui usufono mamalu mo Aana Alofi 3.*

*Na faamaonia le lafo.*

**FOFOGA FETALAI:** Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti. Lau Afioga i le Taitaifono.

**Afioga FALEOMAVAEGA TITIMAEA TAFUA:** Faafetai i lau Afioga i le Fofoga Fetalai. O Sailiiliga a le Komiti ma lona aotelega.

Lau Afioga i le Fofoga Fetalai, ua maea faataatia lenei Lipoti a le Komiti i le Laulau a Fono, ma ou te talitonu ua faitau manino ai foi le mamalu o le Maota nei. Ae tau lava ina ou faailo se oototoga i Sailiiliga a le Komiti i le Lipoti Faaletausaga a le Falemeli o Samoa 2019/2020 ma le 2020/2021.

O le Lipoti Faaletausaga o le 2019/2020 a le Falemeli o Samoa na faamauina ai tupe maua e \$2.3 miliona, o tupe faaalu a le Falemeli e \$2 miliona. O le Lipoti Faaletausaga i le 2020/2021 a le Falemeli o Samoa, na faamauina ai tupe maua e \$2.1 miliona. O tupe faaalu a le Falemeli e \$1.8 miliona.

**MATATIA AUSIA 2019/2020:**

- E ui i aafiaga o le faamai na feagai ai i lenei tausaga faaletupe ae na maoae le tulai mai o le Falemeli i ana matatia ausia. Na faamauina le siitia o ana tupe maua ona o auaunaga faapaaga ma pisinisi i totonu o le atunuu faapea le siitia maua o le faaaogaina o auaunaga tau meli ma afifi i Samoa nei ma atunuu e mamao.
- Na totogiina le aofai e \$196,594 mo tufatufaga a le Malo i le tausaga faaletupe 2019/2020.

**MATATIA AUSIA 2020/2021:**

- Na toe faafoisia ai auaunaga tau meli i se tulaga lelei, siitia le faaaogaina o le auaunaga mo faamomoli i atunuu i fafo ma Samoa nei ona o le tapunia ai o faigamalaga ma vavao ona o le faamai.

- Sa faautaitaia se polokeeti e aofia ai le faaleleia o falemeli i Savaii e faaoga ai fesootaiga tau initaneti.
- Ma sa toe faatulagaina faiga faavae faaetulafono ina ia mautinoa le malupuipua o faamatalaga tau meli, oloa ma so o se meli felafoai faava o Malo e faaoga ai le initaneti.

**ISI MATAUPU:**

Na laga e le Komiti le tulaga o falemeli i nuu i tua (Outposts) pe le o i ai se fuafuaga e faasafua lea auaunaga i itumalo tau mamao ma le taulaga, atonu e faamamaavega i le fegasoloai o tagata ma faaitiitia ai foi le soona tumutumu i le ofisa autu. Na faailoa mai e le Ofisa o lo o faia a latou galuega toe faaleleia o ofisa i nuu i tua e tuuina atu ai le fesoasoani i tagata lautele o lo o taumamao ma le taulaga. Na laga foi e le Komiti le tulaga o i ai auaunaga tuuina atu i nei falemeli i nuu i tua. Na taua e le ofisa, ua tele auaunaga e mafai ona faatino e falemeli i nuu i tua e aofia ai le tologiina o pili o eletise ma pili o le suavai, faatasi ai ma le lafoina o meli. O lo o taumafai foi e faatinoina uma auaunaga o lo o faia i le ofisa autu i nuu i tua e faamamaavega ai i le mamalu o le atunuu o lo o taumamao ma le taulaga.

**FAUTUAGA 1:**

E fautuaina e le Komiti le Ofisa o le Falemeli a Samoa ina ia tagatagai i auala e mafai ai ona faalautele le auaunaga e ala i nisi lala i nuu i tua, ma tuuina atu ai auaunaga uma o lo o faatinoina i le ofisa autu, e faamamaavega ai i tagata i nuu i tua. O le isi itu taua ina ia siitia le faaogaina o auaunaga faatekonolosi (online services) e faigofie ai ma vave le auaunaga mo le atunuu.

**FAUTUAGA 2:**

E fautuaina e le Komiti le Falemeli, ina ia faia se alafua o vaaiga taulai (Corporate Objectives) e fua i ai le eseese o taimi ma tupe maua a le Ofisa, e ala i le tapunia ai o femalagaaiga ma le toe tatalaina, ina ne i toe aafia Samoa i se isi faamai ae ua lava tapena le ofisa mo auaunaga tuuina atu, e le gata i totonu o Samoa ma le lalolagi atoa.

**FAUTUAGA 3:**

E fautuaina e le Komiti le Falemeli, ina ia uunaia le maketiina ma le faalauiloaina o le taua o le pusameli, aua tasi lea tupe maua a le Ofisa.

**FAUTUAGA 4:**

E fautuaina e le Komiti le Falemeli ina ia silasila i se galuega faaleleia mo tulaga o taavale (car park) ina ia faafaigofie ai feoaiga mo le faatinoina o galuega.

**IUGAFONO:**

Lau Afioga i le Fofoga Fetala'i, i le maea ai o iloiloga a le Komiti na faaiugafonoina ai e fautuaina le Fono Aoa'o Faitulafono ina ia

faamaonia ana Lipoti, *P.P.2020/2021 Nu. 110, Lipoti Faaletausaga a le Falemeli o Samoa mo le Tausaga Faaletupe faaiiina 30 Iuni 2020 & P.P.2021/2022 Nu. 11, Lipoti Faaletausaga a le Falemeli o Samoa mo le Tausaga Faaletupe faaiiina aso 30 Iuni 2021.*

Ma le faaaloalo lava.

**FOFOGA FETALAI:** Malo faafetai i lau Afioga i le Taitaifono mo le tolaulauga o Sailiiliga ma Fautuaga aemaise foi Iugafono a la outou Komiti. Malo galulue.

Ia, ou te tapa lau Afioga i le Minisita Honourable Toelupe mo le Tali a le tatou Malo.

**Afioga Hon TOELUPE POUMULINUKU ONESEMO (Minisita mo Fesootaiga ma Faamatalaga Vavave Faaonaponei):** Faafetai i lau Afioga i le Fofoga Fetalai mo le avanoa foi i lenei Matagaluega e tali ai e tusa o le galuega a le Komiti.

Ae le i oo atu la i lea vaega, e faatalofa atu i le paia o le Maota i lenei itula o le aso, aemaise Samoa faafogafoga, tainane foi le tapuaiga a si ou itumalo o Falealili 1 e tapuaia ai faiva o le Palemene i lenei ituaso.

E faatalofa foi i le itupa paia le nofo tatalo aua o tatou faiva. E momoli atu le agaga faafetai i le Afioga i le Taitaifono ma le Komiti e tusa ai o iloiloga aemaise foi le taunuuga e ala i fautuaga aua le galuega fita e le faigofie.

Lau Afioga i le Fofoga Fetalai, ou te tolaulauina atu ai le Tali a le Malo e tusa o fautuaga a le Komiti ua tuuina mai.

#### **FAUTUAGA 1:**

E fautuaina e le Komiti le Ofisa o le Falemeli a Samoa ina ia tagatagai auala e mafai ai ona faalautele le auaunaga e ala i nisi lala i nuu i tua, ma tuuina atu ai auaunaga uma o lo o faatinoina i le ofisa autu, e faamamaavega ai i o tatou tagata i nuu i tua. O le isi itu taua ina ia siitia le faaogaina o auaunaga faatekonolosi (online services) e faafaigofie ai ma vave le auaunaga mo le atunuu.

#### **TALI:**

O le Tali a le Malo lau Afioga i le Fofoga Fetalai e faapenei: Ua faamauina le fautuaga a le Komiti, ma o lo o silasila totoa lava le Falemeli i le faalautele atu o auaunaga i nuu i tua e fua i manaoga mo auaunaga ma le mafai ona faatinoina i se tulaga gafataulimaina. Mo le silafia e lenei Maota, o lo o faatino galuega a le falemeli i lalo o le Tulafono o le Public Bodies Act 2001. O lo o aiaia ai i lalo o le Vaega 8 o le Tulafono lenei ina ia faatinoina galuega e tusa ai ma taiala faapisinisi ia maua ni tupe mama faasili faagaioi e pei o se pisinisi a le Malo.

O le vaega lua o le fautuaga, o lo o faatino i le tulaga tau online services poloketi e faaoga ai fesootaiga faatekonolosi mo auaunaga.

Mo le silafia e le Palemene ma le Komiti, ua mafai e le mamalu o le atunuu ona faatumu pepa manaomia mo le lafoina o oloa ma meli e faaaogaina ai fesootaiga faatekonolosi. Ua mafai foi ona sailia meli felafaoi e faaoga ai fesootaiga faatekonolosi, ma ua fesootai lala uma o le Falemeli mai Savaii ma Matafele, e faaaogaina ai nei fesootaiga. Aepeitai o le vaega autu o le auunaga, o le lafoina ma le felauaina o meli faamomoli e le mafai lava ona faaaogaina ai fesootaiga e pei ona talosagaina.

**Fautuaga 2:**

O le fautuaga 2 e pei ona tuuina mai, fautuaina e le Komiti le Falemeli ina ia fai se alafua o vaaiga taulai (Corporate Objectives) e fua i ai le eseese o taimi ma tupe maua a le Ofisa, e ala i le tapunia ai o faigamalaga ma le toe tatalaina, ina nei toe aafia Samoa i se isi faamai, ae ua lava tapena le ofisa mo auunaga tuuina atu, e le gata i totonu o Samoa ma le lalolagi atoa.

**Tali:**

O lo o mulimulitaia lava e le Falemeli taiala ua maea ona faataatitia i le Fuafuaga alualu mamao ma sini autu 2020-2024 a le Matagaluega. E faatino foi iloiloga o le tala o Tupe ma Taiala i totonu o le ono masina i tausaga taitasi, ma tuuina atu i le Matagaluega e pulea Faalapotopotoga Tumaoti a le Malo i totonu o lipoti faale-kuata. E faia foi suiga talafeagai i Tupe Maua ma Taiala tulituliloa, ma ona aafiaga ae le i maea le tausaga faaletupe. O le ogaoga o faaletonu i tulaga tau tupe o le tausaga faaletupe 2019/2020, ona sa faafuasei ona oo mai le faamai i masina e ono mulimuli o le tausaga faaletupe, sa tapunia ai femalagaiga. O faafitauli e le i tupu muamua, ma sa le i saunia le Falemeli i Samoa nei aemaise le lalolagi, e tali atu i nei faamai oso faafuasei. Peitai, o lea ua mafai ona mataitu ma faatino suiga i galuega, ma ua mafai ona galulue faatasi ma le falemai, e ala i le mulimulitaia o puipuga faale-soifua maloloina i tapenaga uma i taimi uma.

**Fautuaga 3:**

E fautuaina e le Komiti le Falemeli, ina ia uunaia le maketiina ma le faalauiloaina o le taua o pusameli, aua tasi lea tupe maua mo le Ofisa.

**Tali:**

Ua faamauina le fautuaga, ma o lea ua faagasolo faalauiloa e faaaogaina ai fesootaiga faaneionapo (Facebook ma le Upega tafailagi) e faalauiloa ai pusa meli, e ui ina ua tatou molimauina uma, le tele o suiga i auala o fesootaiga, ua fesootai ai le mamalu o le atunuu ma le lalolagi, e faaaogaina ai ala o tekonolosi.

**Fautuaga 4:**



E fautuaina e le Komiti le Falemeli ina ia silasila i se galuega e faaleleia mo tulaga o taavale (car park) ina ia faafaigofie ai feoaiga mo le faatinoina o galuega.

**Tali:**

O le tasi lea o faafitauli o feagai pea ma le Falemeli, ae pei ona silafia, e laititi tele le fanua o lo o i ai le Falemeli i Matafele, ma e leai lava se isi avanoa e ono fai ai se car paka mo taavale. O nei mafuaaga, na talosagaina ai e le Falemeli le Matagaluega o le Siosiomaga ma Punaoa Faalenatura (MNRE) mo le lisiina o le fasi fanua o lo o i ai nei le RSA, mo le fausiaina ai se fale fou mo le Falemeli o Samoa, ina ia faaleleia se nofoaga e tuuina atu ai auaunaga mo le atunuu, ma saunia ma se car paka mo taavale mo i latou e faaogaina.

Ua maea ai lau afioga le Tali a le Malo e tusa ai ma fautuaga a le Komiti. Ma le agaga faaaloalo.

**FOFOGA FETALAI:** Malo saunoa i lau afioga i le Minisita e tusa ai foi ma le Tali a lo tatou Malo. O le avanoa lenei i se tasi o sui usufono mamalu e fia saunoa i le lipoti a le Komiti. Tulai mai lau afioga i le Taitai o le Itu Agai.

**Tofa Hon LAUOFO FONOTOE NUAFESILI PIERRE**

**LAUOFO:** E faamauiina le faafetai i le Pulega ma le Komiti Faatonu a le tatou Matagaluega o Falemeli. O lea lava e matau i tausaga ia e lua faaletupe e pei ona faataoto mai, o lo o maua pea a tatou tupe faasili. O lo o faapena foi i tausaga ia e lua, sa totogi le dividend i le tatou Malo. E ui lava ina laititi le tupe o dividend, a o lea lava sa mafai. O lou la tulai, e momoli le faafetai i le Matagaluega ona e le o se Matagaluega tele, ae ou te matua faafetaia ona o le Matagaluega lenei, e matua malolosi luitau o lo o feagai ma i latou, ona o tekonolosi fou lea ua i ai i nei onapo. Ua tea aso la, aso la e savalivali i le Falemeli fai lau tusi, tuu i le teutusi, faatau lau faailoga stamp ia ona tuu lea e lafo i le air mail po o le local mail. O aso nei, o lea ua fai email i luga o computer, e na o le omiomi lava lele i o le tusi, toe tali mai nei lava i nai sekone. Ia ua le toe pei la o aso la, o aso la sa faapena ona lelei le tulaga sa i ai, ma ola lelei le tatou Falemeli ona sa manaomia tele le service lenei i na foi ona po.

O aso nei, e pei ona ou fai atu, o lea foi e aumai i le lipoti, ua sopoloa foi le silasila a le Komiti, ma le Taitai Komiti i luitau ia faatekonolosi i nei foi vaiata, e pei ona saunoa le afioga i le Minisita, e faigata tele ona maua i ai. Ae pei o le tulaga lea o lea ou te matauina e au i le Matagaluega lenei, o le lelei pulea o tupe. E le tele naua se tupe o maua e latou, ae o le lelei o le faasoasoa ma le pulea lelei o tupe. O le mea lea e faamauiina ai lau faafetai i le Ofisa Sili o Pulega, o le Pulega faapea le Komiti Faatonu o le Matagaluega.

O lea e matauina le tulaga o sailiiliga o nisi vaega e toe tau faatuputupulaia pea le tatou Falemeli ma maua nisi tupe faasili, tupe maua. O lea foi e matauina o lo o taumafai ni faiga faapaaga, o le tulaga taua lea. I lou talitonuga ma lau vaai, ina ia faia ni tatou faiga faapaaga, faapaaga a le Falemeli ma Faletupe, faapaaga a le Falemeli ma Money Transfer, faapaaga a le Falemeli ma nisi e oo foi i Courier. O le vaega lea e le o mafai ona ave i luga o le email pe ave i luga o internet, o parcels. O i lea e i ai le vaega lea, e mafai lava ona faagaoioi ai le pisinisi a le Falemeli, ae galulue faatasi la ma Courier, aua o kamupani Courier tetele ia, e i ai latou vaalele e feleleai faava-o-Malo, ave la i ai tatou, pe a faapaaga ma le vaega lea. Ou te talitonu e taua tele le tulaga e pei ona i ai.

Ae o lea ua faamauina i totonu o le Lipoti a le Komiti le faafitauli lea e tulai mai i le location, le nofoaga o le tatou Falemeli, e le lava le car park. O lea e taoto i le Maota lenei le fautuaga, e tapuni le auala lea e i le va o le ANZ ma le Falemeli, ae faa-car paka le area lena. Aua e leai se mea tele o i ai i le va lena. O le taimi foi lea o le Koviti-19 lea ou te manatua, sa tapuni lelei le va lena, ae tuu i ina ia van o le NEOC lea sa feoai, o lea sa faaoga faa-car paka i ina. E silasila i le tulaga lena, e pei e toe avatu le fautuaga lena, ae silasila aua o i le va o le Faletupe o le ANZ ma le Falemeli. Ia tapuni i ina i le va o le auala lena, leaga o lea ua alu Olo, ae masalo o la e faafofoga mai. Ia tapuni i ina, ae faa-car paka i ina mo taavale a le tatou Falemeli ma le. Aua o lea ua tele isi magaala i tua e ui ai taavale ma luma o le beach road.

Lau Afioga i le Fofoga Fetalai, o le mea taua lena, o le car park. Ia faafetai mo le avanoa.

**FOFOGA FETALAI:** Malo faafetai, malo saunoa i lau Afioga i le Taitai o le Itu Agai ma fautuaga mo le tatou car park.

O lea ua tatou taunuu i le tatou taimi malolo, se i tatou taliu mai foi ona faaauau foi lea o nisi o sui usufono mamalu o fia sausaunoa i le lipoti a le Komiti. Ae o le a faataatiaese Galuega a le Fono Aoa mo le malologa o le Afiafi.

*Na faataatiaese Taulumaga a le Fono Aoa Faitulafono mo lana malologa i le itula e 3:46 i le afiafi ma toe faaauau i le itula e 4:25 i le afiafi.*

**FOFOGA FETALAI:** Ou te faasilasila atu ua toe amatalia nei taulumaga o le Fono Aoa. Faamalo le onosai i le tatou Maota, fia faaleo lava se faafetai faapitoa i lo outou mamalu o lava papale pea mo le faaauauina o le tataou galuega i lenei afiafi. Ua toatele nisi o le tatou Maota ua faanoi mai ona o tuatuagia le maalofia, atonu ua maua se faasiliga malosi i le tatou taumafa ga ti o le aoauli faamaea ai le tatou

galuega o totoa i leni afiafi. E faataatiaese tatou tualumaga mo le malologa ua maea saunoaga a le afioaga i le Taitai o le Itu Agai ma o le avanoa leni mo se tasi o sui usufono e fia saunoa mo le tatou lipoti, ia tulai mai lau Afioga i le Sui mamalu mai Satuipaita.

**Afioga Hon LAUTAFI FIO SELAFI PURCELL:** Faafetai lau Afioga i le Taitaifono, faafetai foi i le Ofisa o le Fono Faitulafono mo le taligasua sa alo atu i ai le Palemene. E momoli ai le agaga o le faafetai maua se faasiliga malosi faaauau ai le tatou mataupu leni afiafi. Ae na o lo'u tulai atu lau Afioga i le Fofoga Fetalai e fonofaapipii i le talanoaga a le Taitai a le matou vaega nei ona o le vaega leni o le Falemeli, o se tasi o Faalapotopotoga Tumaoti a le Malo sa i lalo foi o la'u vaaiga lautele i tausaga ua tea ma e ou te faamaonia lelei le saunoaga ma le Lipoti lea tuuina mai e le tele le operation ao le lelei ia o le faiga. E le misi lava se tausaga ma maua mai ia dividends mai le Samoa Post, e le misi o Lipoti faale kuata e tatau ona maua i le MPE. E le mafai na faaletonu, o le mea lea e momoli a la'u faafetai e oo lava i le taimi, e pei foi ona saunoa le matou Taitai. Ua oo mai initaneti ma oo mai imeli o iina lava na faapea o le a tapuni ai le falemeli ona ua leai se pisinisi foi lea e vaai atu ae sa lototele a le Ofisa Sili o Pulega faapena foi Minsita sa iai e tuu atu pea le avanoa ona tilotilo lea i nisi faiga e maua ai se tupe a le Falemeli.

Ia lea ua oo mai lava i le vaiata o Lipoti ia e 2 o lea lava e manuia le latou taumafaiga, ae e pei o faafitauli a lena sa tulai mai e pei o le le lava o mea tapa ai tagata ia e fia oo atu e manaomia le galuega atonu poo ua iai nisi services ua latou faifai paaga faatasi e faaalu ai le pisinisi lea ua iai nei vaiata. Ae ou te uunai atu lava e pipii atu i le saunoaga a le Afioga i le Taitai, ou te faamoni i le saunoaga lea leaga ua leva na ou faigaluega ai ma le Ofisa Sili ma lana Pulega. Faamalo atu lava faafetai le lototele, tagata ia e manaomia e le tatou Malo e lototetele, aua le tagisa a vaai atu ua sau luitau sue le mea e faafetaui ai. E pei la o le agaga lena o le Pulega lea sa iai a o physical difficulties ia sa ou tapa lea ua ou vaai atu e pei o lea ua o i o le Fanua lea tu ai le RSA.

O le fanua leni sa talosaga foi iai le Housing e omai e fai ai foi se fale ae te i ua toe maua le isi vaega o le fanua la iai le Housing la ua faatele iai la latou Ofisa. Ae faafetai la lea ua vaai atu ua talosaga i le MNRE mo le fanua lea tu ai le RSA atonu e faafaigofie ni taumafaiga a le Falemeli, aua lea tu mai le Afioga i le Sui Palemia o ia lea e na te lisiina, o ia e vaaia le vaega lea o le RSA atonu e faafaigofie ai se taumafaiga a le Matagaluega pe a le Afioga i le Minisita faatalanoa faaminisita, atonu o se upu o le Sui Palemia e vave ai le tou mataupu mai le Matagaluega a le MNRE. Pau lea o se tala faaopopo o leni itula lau Afioga faafetai.

**FOFOGA FETALAI:** Malo faafetai mo le sao foi mai le sui usufono mamalu mo Satuipaitea aemaise foi o nisi o futia ua tuanai, e faamalosiaua atili ai pea le tatou Pulega o le Falemeli, lea ua matau atu o lea ua fou mai le sa o Safata 1.

Tulai mai lau Afioga i le sui usufono mamalu.

**Afioga LEAANA RONNIE POSINI (Safata 1):** Ia e faafetai tele lau Afioga i le Fofoga Fetalai maua foi so matou avanoa, e fai ai foi sa matou tuualalo poo se matou fautuaga i le Lipoti Faaletausaga a le Matagaluega, muamua ona momoli le agaga faafetai tele i le Pulega, Ofisa Sili o Pulega tau faafoefoaina o le tatou Faalapotopotoga. I la'u matau e faaluaina ia finagalo o nisi o sui momoli le agaga faafetai tele i le Pulega ma le Ofisa Sili o le Matagaluega ona e matau o lea maua a ia tupe faasili, ae pei o lea matua manino tele ia o le faatauvaga lea ua iai ae pei o nao o mea ia o parcels ia e lafo i. Tasi lea mea ou te iloa pau lea o le mea lea maua ai le tupe a le Matagaluega lea e momoli ai le agaga faafetai tele i le Ofisa Sili o Pulega i le tulai mai i le tauvaga o loo faia nei.

A o lau tau matau atu e tau fesoasoani ai foi o lea ua iai foi le tatou Ofisa o le Fono Faavae pe le tau ane ai finagalo o le tatou Malo e faaoga foi lona Ofisa e mafai ona lafo atu iai ia mea foi ia. O a ni mea e fia fai e faaoga foi tatou Ofisa ia o Fono Faavae e fesoasoani mo le feoaiga ole tatou atunuu ae faaoga i mea ia tulaga tau falemeli, ae aua foi le manatu i tulaga ia tua faailoa ia malamalama foi le tatou atunuu i totogi o mea e lafo i le tatou Falemeli e iloa foi e iai foi se faatauvaga ma toatele ai tatou tagata e agai ai e faaoga le tatou auunaga lea o le tulaga lea sa ou paeaiga ea lea na talu ai sa ou lauga ai i le mea foi lea o le taofi o le auala lea i le va o le Falemeli male Faletupe e fai ai se tatou paka foi lea o taavale. Aua o lea ou te iloa ua tele lava auala o lea ua faaoga i totonu o le tatou taulaga ae faaoga la e le tatou Falemeli ma le Faletupe, i le auala lea pei o lea na taua foi e se tasi o sui o lea sa faaoga i le taimi o le Koviti. A o lau matau e le o afaina le feoai o le gasologa o le tatou atunuu o la ua tele magaala e fai. Ae ou te tau le au foi i le mea lea o le fai o se isi ofisa o le tatou Falemeli, i lau lea tau matau e le afai o le tupe lea tatou te maua e le matua tele se tupe o maua mai ai ae a tatou fau se Ofisa tele ma se tau tagata.

Ou te talitonu e tau vaavaai mamao i ai le Minisita ma le tatou Malo i le tulaga o le alu o le tupe, o se tupe e mafai ona maua mai i le mafai ona toe maua tele ai se tatou tupe aua ua tele le faatauvaga o mea lea o le tulaga lea o le tatou falemeli. Ao le nofoaga lea foi lea taua i tai i le RSA o le tasi lona nofoaga manaia, na o ta aluifo a i la ta taavale pei a la ta te ta ta musika ai foi lea i le faalogo i le manaia o le faili iina i le fale lea. E manaia foi lona fale aua e leai foi ni fale tutotonu i totonu o le taulaga mea ia o fale e mapu ai tatou tagata, pei o nai manatu ia e fesoasoani atu ai i le Minisita ma le Faigamalo, ma le agaga faaaloalo.

**FOFOGA FETALAI:** Malo faafetai mo le sao foi o Safata 1 i le tatou Lipoti, ia malo a le fesoasoani i le tatou lipoti. Ia lau Afioga i le Taitaifono, ia lea ua maua atu e iai se tasi o sui e te tali fuaitau foi i nisi o mataupu sa laga e sui mamalu.

**Afioga FALEMAOMAVEGA TITIMAEA TAFUA:** E momoli atu le faamalo male faafetai lau Afioga mo le avanoa. O lea matau atu e tusa o saunoaga i Afioga i le Taitai o le Itu Agai, faatasi foi ma le Afioga se tasi foi o sui matua o le tatou Maota nei, le Afioga ia Lautafi, e faapena foi ma le sui lenei faapena ona sausau i luma lona taumafai malosi le Afioga ia Leaana. E momoli atu le faamalo ma le faafetai, e lagona le fiafia o lauga uma ia na aumai na o le faafetai lava na momoli i le Ofisa Sili o Pulega i le lelei ona galueaina e le Matagaluega. E le laititi foi lenei seleni i tupe mama. Malo lava le galulue, lea foi na ona toe faaopopo atu ai foi o le faamalo ma le faafetai tele, faafetai le galulue faafetai i le faamaoni i le taumafaiga o tiute ma faiva, lea foi pei ona e faafofoga mai foi i fautuaga na tuuina mai e Afioga i sui usufono mamalu nei o le Palemene. Le Afioga i le Taitai ma se tasi foi o sui iloga o le tatou Itu Agai, le Afioga ia Lautafi faapea le Afioga ia Leaana.

O lo o faapena ona momoli atu le faamalo ma le faafetai i lau Afioga o lea e momoli atu ai le faamalo male faafetai i lau Afioga. O lea momoli atu ai le faamalo male faafetai malo le galulue masalo nao le pau lea lau Afioga i le Fofoga Fetalai momoli atu ai le faamalo ma le faafetai tele mo fautuaga e tusa foi ona tuuina mai. Manaia lou finagalo lau Afioga Leaana ia aua nei lokea pea le RSA, taatia ai pea o loo manaomia lava nai fale ia e malolo iai i le aoauli ae faafetai tele lau Afioga i le Fofoga. Manuia le Fono.

**FOFOGA FETALA:** Ia se i tulai mai lau Afioga i le Minsita o Galuega Tetele.

**Tofa Hon Olo Fiti Afoa Vaai (Minisita mo Galuega, Felauaiga ma Atinae Esee):** Faafetai ua tulai atu lava ma le agaga faaaloalo ona sa maua ia se tasi foi o fautuaga e pei ona agai mai ai le Afioga i le Taitai o le Itu Agai, le tulaga lea i le va lea o le ANZ ma le ou te leiloa i le Afioga i le Taitai o le Itu Agai poo ai na ia maua ai le vaega lea ae ua fetau tonu a lea ua toetiti faauma la matou plan i le tulaga lea foi lau Afioga i le Fofoga Fetalai. O au ou te le talanoa i ni a'u plans ae ou te talanoa atu i results o a'u plans lea la ua laga mai e le Afioga i le Taitai o le Itu Agai le vaega lea toetiti a faamaea la matou polokalame lea i le va lea i le tulaga la lea o le a faatasia le lane ae entry le isi pito ae exit le isi pito ae faaangel le tatou car parks, ona pipii ai loa lea ma matou parking meters o le plan atoa la lena o le mea lea o le long term plan a le LTA o lea fuafua o le a faamuamua le vaega lena o le fautuaina o le faiga o tatou fale tetele ia totonu o le taulaga. Ona ua outou silafia ua

utiuti le mea e paka ai taavale ae ua faaopopo le numera o taavale o iai le le tulaga foi lea e ui atu ile PUMA ma le MWTI i le fausiaina o fale tetele nei, o le a avatu ai ma le tulaga foi lea e ao lava ona iai ni parkings i grounds floora. Ona o lea e agai i luma le tatou tilotilo i le tele mai o taavale ma tulaga faapena ae ia aua nei iai se tulaga o le tau sue o ni car park. O le tele ia o atunuu e faia mea faapea o le atunuu lea o Signapore o le latou mea lea fai e totogi atoa lava e le taavale lana park i le tausaga atoa, ona alu atu a lea o le tagata ua paka i lana paka lena e le toe iai ni tulaga.

O le isi foi vaega lea ua fai e isi atunuu ua paka uma a latou taavale i se paka e tasi ae savali i latou galuega poo le faaoga o trains foi ia pea faapea ua oo i atunuu o le lalolagi ia tulaga lena o le feomai i le tulaga lava ia i le leai o ni paka i le taulaga. Ae faafetai foi i le Afioga i le Taitai o le Itu Agai ai sa faalogologo i a'u plans ia lea sa tulai mai ai ma aumai lona finagalo e ui a e tele tausaga e le faia le mea lea ae lea ua ou faiatu toeititi a faamaea mai le matou galuega lea ona fai loa lea fuafuaaga lea pei ona fautuaina mai, ma le faaaloalo. Faafetai.

**FOFOGA FETALAI:** Malo faafetai.

**Tofa Hon Laufo Fonotoe Nuafesili Pierre Laufo:** Lau Afioga i le Fofoga Fetalai...

**FOFOGA FETALAI:** Oi, e a e i ai se mea fou po o se...

**Tofa Hon Laufo Fonotoe Nuafesili Pierre Laufo:** Ia, leaga po ua faasefulu ona tau mai lou igoa e le Afioga i le Minisita.

**FOFOGA FETALAI:** Oi ia, se i saunoa lau Afioga i le Taitai o le Itu Agai.

**Tofa Hon Laufo Fonotoe Nuafesili Pierre Laufo:** Leai e ao foi ona ou tulai atu e faamau lau faafetai i le Afioga i le Minisita ua taliaina se fautuaga, ua ia taliaina se fautuaga. Talosia o le fautuaga muamua lea o lea ua talia ma aveaveai faapea. Ia tele ni fautuaga e avatu i le matou Itu e te talia i le lumanai. A o faailoga ia o Minisita e ese lou fia faalogologo atu i le siufofoga, o ana plans, o pakaga o taavale, ua oo i trains. Ua outou faafofoga atu i trains la ua tau mai plans a le Minisita, o le a fai tatou trains. Faafetai Olo, faafetai i nei mau mea uma. A o le mafuaaga lava, faafetai ua talia le fautuaga. Ona o le mafuaaga na avatu ai le fautuaga, ua manatu alofa i le Afioga i le Sui Palemia. O le Sui Palemia o le Peresetene o Fitafita tuai o latou ia e ona le RSA. Ia lea la ua ou manatu ai, e manaia le faaoga muamua o space ia ae le i oo atu ni mafaufauga i le RSA. O lea foi ua saunoa le Taitaifono faapea foi le afioga i le sui usufono ia Leaana, faaavanoa pea le RSA o lea e i ai lona taua i le taimi nei, o la e aoga e mapu i ai latou foi o lo o faaoga lena

foi fale aua tulaga o le faasau ai ma tafafao ai. Ae pei o le tulaga lea, faafetai Olo. Faafetai mo le taliaina o fautuaga lelei. Ioe, e le uma ai fautuaga e faasolosolo atu pea. Ae faafetai i lau Afioga i le Fofoga Fetalai.

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Ia, malie lava lau Afioga i le Sui Palemia se i tuu atu pea i le Afioga i le Minisita. Ia, tulai mai lau Afioga i le Minisita o Galuega Tetele.

**Tofa Hon Olo Fiti Afoa Vaai:** Ia e aoga lava le mea foi lele o le sailiili e maua mai ai ni tulaga lelei. A o le plan lea lau Afioga i le Fofoga Fetalai i le vaega lea pei ona talanoaina, na amata mai i le aso 10 o Mati i le tausaga na tea nei 2022 ona plan le mea lea. Pei la o le mea lea ou te faamanino atu ai, e lelei tele le faalogologo a le Taitai o le Itu Agai. Ae na ou taunuu atu, masalo ua 5 tusi talosaga a le ANZ ia ma le Post Office foi e tatalo mai i totonu o le faigamalo i le tulaga tonu lava lea ua ou sau loa faatino le plan ina o paka ia. Ia ona o le tilotilo foi lea i a latou pisinisi ua tau leai ni latou customers e o atu ona e fiu e sue se paka. O lea la na ou oo mai ai loa amata mai ai loa lea o le faiga lea i le tausaga na tea nei ia Mati 2022, a o lea faatoa maua e le Taitai o le Itu Agai ananei. Ma le faaaloalo.

**FOFOGA FETALAI:** Ia, ou te iloa o lea ua malamalama lea mataupu. Tulai mai lau Afioga i le Sui Palemia.

**Afioga Hon TUALA TEVAGA IOSEFO PONIFASIO:** Faafetai lava mo le avanoa. E fiafia foi le agaga i lenei itula o le aso i le faalogologo atu foi i felafolafoaiga matagofie i tulaga foi o car park a le falemeli o taua ai foi se tasi o aseta o lo o faapena ona tausia e lenei Faalapotopotoga po o le RSA, o le Return Services Association po o le Faalapotopotoga a Fitafita ua toe taliu manumalo mai.

Lau afioga i le Fofoga Fetalai, ua toe lagona lava lou mafanafana ua toe tulai le Taitai o le Itu Agai ma saunoa mai, aua le faia fua le RSA o lo o i ai lona aoga. Ia pei la o lea o le a ou agai i ai i le itu lea, tau lava ina faamanino atu i le tatou fesilafaiga foi i lenei itula o le aso, e sao lelei lau Afioga i le Taitai o le Itu Agai, o le aoga ia o lenei elelee, aemaise foi o le fale o lo o tu ai. E ui ina paovale le musika ae e le o se mea lena a matou, o le mea lena a le isi kamupani o lo o faapena ona malomaloa se i tulou i totonu o le fale o fitafita ua toe foi mai. Ma o luga foi o lenei elelee o lo o i ai le pine o lo o eli i lalo o le palapala, o le pine uamea o lo o taua ai le taua o lenei nofoaga. O le pine lea e oo mai le faavavau, e tumau i le Faalapotopotoga lea a le RSA, o le foai lea o lo o faapena ona i lima nei o lenei Faalapotopotoga. Ia e tau faalogologo atu lava ma le faanoanoa i lenei aso ona e maitauina foi i le

faigamalo foi sa i ai, sa taumafai lava le faigamalo e aveese matou. E le i faigofie foi lena tulaga. Aepeitai, o lea lava ua sui le tatou Malo, ae faafetai o lo o tu pea le fale o le RSA. Ma a silasila foi a outou Afioga, ua le toe tele ni fale faapenei o lo o o tulai i totonu o Samoa. O le tele lava o fale tuai ua faapena ona tala i lalo ma uma atu na memories lelei. Ae e i ai le agaga o le RSA o lo o i ai le matou fuafuaga e toe faaleleia le nofoaga lea ma toe fausia se fale e sili atu ona lelei ma tumau e oo i le faavavau, aua le auunaga i le mafuaaga ua ala ai ona faatu lena asosi.

Ia a o le tulaga lena, e tatalo atu i lena itu, i lena tausaga ua tea a o tulai mai le tou faigamalo, ua talepe lava le maa. A na ou le tu i le maa, ua talepe ua amata ona sua e masini. O le faaupuga faapea e ave e faatu i tua o le uati ae se i faalelei i mo le car park i luma o le fale o le Malo. Peitai ou te taunuu atu ua taei rails ma pa, a o mea nei, aua le taalo ai se isi. O le maa faamanatu na fausia e nai tina o faletua ma tausi o e na maliliu pe sa tau foi i le taua lona lua o le lalolagi. E ao pea ona tatou faataua le auunaga ae aua ne i tatou ula i ai.

O le agaga lena e tulai atu ai mo le manino foi o lea mataupu, ua tuu atu le matou talosaga i le MNRE ina ia toe faafoi mai le lisi i le RSA ona o lo o i ai matou fuafuaga alualumamao, ae faafetai o lea lava o lo o auai mai le Taitai o le Itu Agai, faataoto pea le RSA i lima ma aao o fitafita manumalo ma ua toe foi mai. Faafetai tele lau Afioga i le Fofoga Fetalai.

**FOFOGA FETALAI:** Malo faafetai ua manino lea vaega. Se i tulai mai lau Afioga i le Minisita mo lau saunoaga.

**Afioga Hon TOELUPE POUMULINUKU ONESEMO:** Faafetai i lau Afioga i le Fofoga Fetalai. E i ai foi le talitonuga ua lava taoso lena Matagaluega i saunoaga foi ma timaiga aemaise foi faalaeiau. E faafetai ai foi le Matagaluega, e le gata i le Taitai o le Itu Agai aemaise sui usufono, aemaise foi le Afioga i le Sui Palemia ma le Afioga i le Minisita. O le mea lea e lagona ai le agaga faafetai i lena ituaso.

Na o se faaopoopo i finagalo o Afioga i Minisita e pei ona taua. Sa taua le tulaga i faiga faapaaga. Ae lau Afioga i le Fofoga Fetalai, i le taimi nei o lo o faapea ona faatinoina lea vaega i le tatou falemeli, aemaise lava i nuu i tua i Savaii, o lo o faatino ai le auunaga o le tatou money transfer e i ai le galulue faapaaga ai ma le Western Union ma isi tulaga o lo o mafai ona faatino aemaise foi o auunaga pei ona mafai ona totogi ai tulaga tau pili vai, o le pili EPC, cashpower ma tulaga faapena, o lo o mafai ona faatinoina ai ia auunaga e pei ona fautuaina e le Maota.

E oo foi lau Afioga e pei ona fautuaina le tulaga i le faigapaaga ma couriers, ia pei lava ona silafia lau Afioga i le Fofoga Fetalai, o lo o i ai nai couriers o lo o i totonu o Samoa, ia o i latou ia o tatou competitors ia ma le tatou auunaga. Peitai, ia, o lo o faipaaga ma falemeli i Niu



Sila ma Ausetalia, i lalo o le faamalumaluga ma le tatou UPU po o le Universal Post Union a le lalolagi ia lea o lo o totogi ai le tatou subscription i tausaga taitasi ina ia auai Samoa aemaise o le galulue faapaaga lea ma isi auaunaga tau falemeli i le lalolagi. Ma e pei lava ona i ai timaiga ma fautuaga, ia o le a tilotilo foi i nisi faigapaaga talafeagai aua le faalauteleina o le auaunaga e pei ona fautuaina e le mamalu o le Maota.

Ou te manatu e le toe oo se matou vaivaiga o le Matagaluega ma le auaunaga a le falemeli i le tulaga i le lisi pei ona i ai. O lea ua saunoa le Maota, o le a tagatagai i ai le Komiti Faafoe aemaise o le Ofisa Sili o Pulega ma le Matagaluega i le tualga e ao ona faatino. E faamauiina foi le tulaga i le fuafuaga po o plans a le Matagaluega o Galuega. E tatalo ia vave faataunuu ia vaega e fesoasoani i le auaunaga e pei ona i ai.

E faamauiina foi le tulaga i le faafetai i le sui usufono matua o le Maota, le sui usufono mo Satupaitea, aemaise foi o fautuaga mai le sui usufono mo Safata 1, i le tulaga o le tatou fonofaavae. Ia, atonu pei lava ona tau faaataata atu, o lea se i tulimatai atu le tulaga e taoto ai le tatou fonofaavae ma atinae i le lumanai, ona tilotilo lea i le mafai ona faatino o lea tulaga. Ma ua faamauiina ma le agaga faaaloalo, o le a agai atu i ai se fuafuaga i se taimi o i luma.

I galuega faalauiloa, pei na pau lea o le tulaga o lo o totoe. E pei lava ona manino i totonu o le Lipoti o lo o faagasolo le tulaga o galuega faalauiloa a lenei Matagaluega i ana auaunaga. E i ai le talitonuga o le agaga foi lena o le tatou Maota.

E avea ai lenei avanoa e faalauiloa atili ai le tulaga tau galuega a le falemeli. Pei lava ona silafia ina ua tupu faamai, ia pau lea o le tulaga sa mafai ai ona momoli a tatou faamomoli, aemaise lava ua faamauiina le tele o le koko o lo o ave i fafo e ui atu i le tatou falemeli, e le gata i Amerika, Iapani ma tulaga uma o lo o i ai e mafai ona faatinoina ai. O le mea lea e faalauiloa atu ai foi le auaunaga tau falemeli o lo o maua avanoa mo ia faamoemoega lelei.

Ia faauma ai se tala lau Afioga i le Fofoga Fetalai i lenei avanoa e momoli atu ai le agaga faafetai i sui usufono sa sausaunoa foi ma aumai ma faafetaia le auaunaga ma faamalosia i le Matagaluega i le Tamaitai Pule ma le Komiti Faafoe ma le Matagaluega aua le latou auaunaga. Faafetai foi i lau Afioga i le Taitaifono o le Komiti o Tupe Maua ma Tupe Totogi i le galuega e le faigofie. E matauina i lenei vaiaso le tele o galuega lelei a Komiti e fautuaina ai le Kapeneta ma le Malo, aemaise le auaunaga a Matagaluega.

Ia e faamuliai ai se tala, faafetai i le auaunaga a le Komiti Faafoe aemaise le Tamaitai Pule ma le Matagaluega o le Falemeli mo le auaunaga e tautua ai Samoa. E faauma atu ai se tala ma le agaga faaaloalo, ia manuia tele le tatou Fonofaavae.

**FOFOGA FETALAI:** Malo saunoa malo malele i lau Afioga i le Minisita e talifuaitau foi i nisi o mataupu sa laga e sui usufono mamalu i le Lipoti a le Komiti o le tatou Falemeli. Ia malo faafetai.

Ou te tapa lau Afioga i le Taitaifono mo le lafo.

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le P.P.2022/2023 Nu. 17, Lipoti a le Komiti o Tupe Maua ma Tupe Totogi i le P.P.2020/2021 Nu. 110 & P.P.2021/2022 Nu. 11, Lipoti Faaletausaga a le Falemeli o Samoa mo Tausaga Faaletupe 2019/2020 & 2020/2021.*

*Faaluaina e le sui usufono mo Lefaga ma Faleaseela ma le sui usufono mo Safata 2.*

*Na faamaonia le lafo.*

**FOFOGA FETALAI:** Ou te tapa lau Afioga i le Minisita mo le lafo o Tali a le tatou Malo.

**Afioga Hon TOELUPE POU MULINUKU ONESEMO:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o Tupe Maua ma Tupe Totogi, e pei ona ou tolaulauina.*

Ma le agaga faaloalo.

*Faaluaina e le Minisita mo Galuega, Felauaiga ma Atinae Eseese ma le Minisita mo le Soifua Maloloina.*

*Na faamaonia le Tali a le Malo.*

**FOFOGA FETALAI:** Malo faafetai. Toe 13 tatou Lipoti.

**P.P.2022/2023 NU. 19, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU.97 & P.P.2021/2022 NU. 62, LIPOTI FAALETAUSAGA A LE FAALAPOTOPOTOGA INISIUA TAU SOIFUA A SAMOA MO TAUSAGA FAALETUPE 2019/2020 & 2020/2021**

**P.P.2022/2023 NU. 80, TALI A LE MALO I LE P.P. 2022/2023 NU. 19, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU. 97 MA LE P.P.2021/2022 NU. 62, LIPOTI FAALETAUSAGA A LE FAALAPOTOPOTOGA INISIUA TAU SOIFUA A SAMOA MO LE TAUSAGA FAALETUPE 2019/2020 MA LE 2020/2021 – ILOILOGA AUILILI**

**FOFOGA FETALAI:** Tulai mai lau afioga i le Taitaifono o le Komiti o Tupe Maua ma Tupe Totogi.

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai, ou te faatu le lafo, *Ina ia faautagia e le Fono Aoa le lipoti a le Komiti o Tupe Maua ma Tupe Totogi o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Lefaga ma Faleaseela ma le sui usufono mo Aana Alofi 3.*

*Na faamaonia le lafo.*

**FOFOGA FETALAI:** Ou te tapa lau afioga i le Taitaifono mo le totaulauina o Sailiiliga, Fautuaga ma Iugafono a le Komiti.

**Afioga FALEOMAVAEGA TITIMAEA TAFUA:** Faafetai i lau afioga i le Fofoga Fetalai, o nai sailiiliga a le Komiti i lona aotelega. O le lipoti faaletausaga i le 2019/2020 a le SLAC na faamauina ai tupe maua e \$13 miliona. O tupe faaalu a le Faalapotopotoga e \$11.4 miliona. O le lipoti faaletausaga 2020/2021 na faamauina ai tupe maua e \$12.8 miliona. O tupe faaalu e \$11.4 miliona.

**O luitau na feagai ma le Faalapotopotoga i le 2019/2020 & 2020/2021:**

Aafiaga tau inisiua o soifua – O aafiaga faainisiua e i ai faatasi ma aafiaga faaletupe e fesootai ma le faia o tau, taliaina, faagaoioiga ma faamanuiaga i lalo o ana inisiua e tusa ai ma aofaiga e totogi atu pe a maliu lē ua inisiua po o ua matua foi le inisiua.

Aafiaga tau Maketi (fesuiaiga) – Aafia tau fefaatauai o konekarate tau tupe mai fesuiaiga le tumau o tau o tupe mai fafo aemaise o aafiaga i tupe tului.

Aafiaga tau aitalafu - O aafiaga tau aitalafu, o le gau e aliae mai ona ua le mafai ona ausia e le isi paaga faakonekarate tuutuuga atoatoa mo le taimi e tatau ai ona totogi aitalafu.

**FAUTUAGA:**

1. Fautuaina e le Komiti le Faalapotopotoga Inisiua Tau Soifua a Samoa ina ia faamalosiā ni polokalame faalauiloa (awareness programs) e uunaia ai le taua o le inisiua tau soifua i le tagata faigaluega. E le gata o tagata faigaluega ae e uunaia foi sui usufono o le Palemene e faia a latou inisiua pea tulai mai i le tofi.

2. Fautuaina e le Komiti le Faalapotopotoga ina ia fautuaina tagata uma o lo o faamanuiaina i avanoa e galulue ai i atunuu i fafo, ona faia a latou inisiua e kava (cover) ai o latou soifua mo le faamanuiaga tau tupe.

**IUGAFONO:**

I le maea ai o Sailiiliga a le Komiti na faaiugafonoina ai e fautuaina le Fono Aoao:

*Ina ia faamaonia le P.P.2020/2021 Nu 97, Lipoti Faaletausaga a le Faalapotopotoga Tau Inisiua a Samoa mo le Tausaga Faaletupe faaiiina aso 30 Iuni.*

*Ina ia faamaonia le P.P. 2021/2022 Nu 62, Lipoti Faaletausaga a le Faalapotopotoga Inisiua Tau Soifua a Samoa mo le Tausaga Faaletupe faaiiina i le aso 30 Iuni 2021.*

**FOFOGA FETALAI:** Malo faafetai i lau afioga i le Taitaifono mo le tolaulauga o sailiiliga aemaise foi o fautuaga, a le tatou Faalapotopotoga. O le avanoa lena lau Afioga i le Sui Minisita mo le tali a le Malo.

**Afioga Hon LEOTA LAKI LAMOSITELE:** E faafetai mo lou avanoa, i lau afioga i le Fofoga Fetalai. E tuuina atu tali a le Malo e tusa ai ma le Lipoti a le Komiti o Tupe Maua ma Tupe Totogi, e faatatau i le Lipoti Faaletausaga a le Faalapotopotoga Inisiua Tau Soifua a Samoa, mo le tausaga faaletupe 2019/2020 ma le 2020/2021.

**Fautuaga 1:**

E fautuaina e le Komiti le Faalapotopotoga Inisiua Tau Soifua ina ia faamalosi ni polokalame faalauiloa (awareness programs) e uunaia ai le taua o le inisiua tau soifua i le tagata faigaluega. E le gata o tagata faigaluega ae e uunaia foi sui usufono o le Palemene e faia a latou inisiua pe a tulai mai le tofi.

**Tali:**

O le tausaga faaletupe amata atu i le 2021/2022 na faamalosi ai polokalame faalauiloa a le Faalapotopotoga. O le 2021 na faatino ai le career day mo Aoga Tulagalua i Salafai e faalauiloa ai le taua o le inisiua pe a oo ina avea alo ma fanau e fai ma tagata faigaluega, pe fai pisinisi foi. O lo o tapena foi le faamoemoe mo Upolu ae ua faatuai ona o aafiaga o le Koviti-19.

O lo o faatino foi faalauiloa i luga o televise ma leitio, o auala faatekonolosi i nei ona po, faatasi ma laupapa faailo, e pei ona tagatagai i ai i Salelologa, Lepea ma Malifa. Sa faatino i le 2022, faalauiloa mo sui o nuu i Savaii ma Upolu e auala atu i le Matagaluega o Tina ma Tamaitai. Sa faatuina foi se faleie i le Koneferenisi tele a le

Ekalesia Metotisi e faalauiloa ai lenei auunaga ma o lo o i ai le faamoemoe e faasolo i nuu ma alalafaga, ua faaoo mai talosaga, Ofisa o le Malo, faapea ma aulotu. O lo o i ai le faamoemoe e talosaga se avanoa mo sui usufono o le Palemene mo se avanoa faalauiloa ae o lo o asia lava e sui sooupu o lo o faakonekarate e le Faalapotopotoga, latou te faatauina inisiua i nisi o sui usufono taitoatasi.

**Fautuaga 2:**

E fautuaina e le Komiti le Faalapotopotoga ina ia fautuaina tagata uma o lo o faamanuiaina i avanoa e galulue ai i atunuu i fafo, ona faia a latou inisiua e puipua ai o latou soifua mo se faamanuiaga tau tupe.

**Tali:**

O lo o faataunuina lenei faalauiloa e i latou o lo o faigaluega i atunuu i fafo, e pei o seila o lo o i lalo o le vaaiga o le Samoa Shipping Services ma o lo o fesoasoani foi le SSS i le faamautuina o le totoigiina o nei inisiua ina ia aua nei faaletonu inisiua o seila. O lo o faatulaga foi se taimi, polokalame mo RSE aemaise se auala e faamautu ai le totogina o latou inisiua a o i atunuu fafo, ina ia le afaina a latou inisiua.

O lo o uunaia lava e le Faalapotopotoga nei sui faigaluega peitai, o le faitalia lava o le tagata e faia ai lana inisiua ma ia aua nei faaletonu le totoigiina ina saogalemu lana faamanuiaga tau tupe, pe a tulai mai se faaletonu i lona soifua, pe a maea le taimi faatulagaina o lana inisiua. E tuuina atu ma le faaaloalo tele.

**FOFOGA FETALAI:** Malo saunua i lau afioga i le Minisita mo le tolaulauina o tali a lo tatou Malo, e tusa ai o fautuaga ma sailiiliga a le tatou Komiti.

O lea ua avanoa le tatou Maota mo se isi e fia saunua. Tulai mai lau Afioaga i le Taitai o le Itu Agai.

**Tofa Hon LAUOFO FONOTOE NUAFESILI PIERRE**

**LAUOFO:** E faafetai i lau afioga i le Fofoga Fetalai, ua faamalo le folau i lenei itula o le afiafi. Ua faafetai ua afea e le Komiti ia tulaga o insure po o le life insurance mo seila i luga o tatou vaa. O i latou ia o lo o galulue faaseila i luga o meli lau pasese ma luga o container, galulue faakonekarate ma le kamupani i Italia o le MSC, lea e i ai le meli lea sa afea Apia talu ai nei, ma malolo mai nisi o tatou seila Samoa. E masalo, e le iloa po o ua fia se fuainumera o tatou seila o galulue i le taimi leni i fafo. E masalo o lea e afio mai le afioga i le sui usufono ia Lautimuia, o ia lea sa Ofisa Sili i le Matagaluega lea, po o le Kamupani lea o le tatou Malo e silafia tulaga ia. E manaomia foi a latou insure pe a faapea e le o i ai se insure i le taimi nei.

A o tulaga i le auvaega lea e galulue faavaitaimi, ia e tasi lea vaega e tatau ona fai ni latou insure, aua o latou aiga, aemaise pe a faapea o i ai ni latou toalua ma fanau o faamuli atu i Samoa nei, e tatau ma taua ona fai ni latou insure, aemaise le mataupu lea tau i tatou leoleo. Aua o se mataupu foi ua leva ona talanoaina lea mataupu. E tatau ona fai insure a leoleo, aemaise lava latou ia o deploy e fafo i galuega o le puipuiga, po o le security i isi atunuu o le Pasefika ma Aferika. E taua lava le fai o ni a latou insure. E faafetai o lena ua asiasi i ai se finagalo o le tatou Komiti mo le faatalanoaina ma le tatou Kamupani Insure. E faafetai o lea ua faamauina le tupe faasili, e latalata i le lua miliona i le tausaga faaletupe e pei ona talanoaina. O lea lava e matauina i le tele o tatou lipoti o Matagaluega ma Faalapotopotoga o lo o maua lava a tatou tupe faasili, faamalo le galulue. E taua foi lenei Faalapotopotoga i totonu o le tatou atunuu, e taua le latou auunaga.

A o nai fesili ia e tusa ai ma le lipoti faaletausaga, o lea ou te tilotilo atu i investments ia a le tatou SLAC, o lo o lelei ia tulaga, ou te talitonu o lo o lelei ia investment ia i le National Pacific Insurance, ia faapea foi le CSL ma tatou ponds ia a le Malo ma le UTOS. A o le tatou investment lea i le Samoa Marine Cable Company, e faafesili atu lava pe o le a se tulaga o lo o i ai, e ova atu i le lua miliona le tupe a le SLAC e invest i le Kamupani lea. Ae po o le a se tulaga, a o le a se tala lata mai, ae po o maua ai se return a le tatou SLAC mai lea foi investment? O le isi vaega e fia oo i ai se fesili o le tulaga o tatou insurance liabilities, o le a se faamalamalamaga lau afioga i le Taitaifono, o mea ia o premiums over pay, ua ova pay mo premiums. E ova atu i le onoselau afe ia premiums ova pay lea ou te vaai atua i i le tatou lipoti. O le a se faamalamalamaga o ia ova pay.

O tatou tupe ia a le SLAC o lo o teu i faletupe, e le gata i Samoa nei ae faapea foi fafo. O lea e faafesili atu ai, i le vaeagatupe lea o lo o teu i le faletupe i Niu Sila, i le BNZ bank, e \$1.6 miliona, po o le a le faamoemoe o lea teugatupe? E i ai se mea o faamoemoe i ai le tupe lea o lo o teu i Niu Sila i le faletupe lea o le BNZ. Ia e faapea foi le faletupe o le Westpac i Ausetalia o lo o teuina ai se selau limasefulu afe. E faafesili atu pe i ai se fuafuaga a le tatou Kamupani SLAC mo ia vaegatupe. O nai fesili ia lau Afioga i le Fofoga Fetalai.

**FOFOGA FETALAI:** Malo faafetai i lau Afioga i le Taitai o le Itu Agai, e tusa foi o nisi o faafesili, aua lava le faamalamalama atili o le lipoti a le tatou Komiti.

Ia tulai mai le sui usufono mo Salega 1.

**Afioga FEPULEAI FAASAVALU FAIMATA SUA (Salega 1):** E faafetai mo le avanoa i lau Afioga i le Fofoga Fetalai, ua maua foi se avanoa e fai ai se manatu o lenei usugafono. Ou te manatu o le taimi muamua lea ua maua ai se avanoa e tulai i le tatou faasologa o lipoti

faale-komiti aua Matagaluega, aua le tulaga o lipoti mai i le Palemene o le Tala o le Tupe Faaletausaga.

Ia o lenei vaega o le afiafi e momoli faafetai i le afioga i le Taitaifono ma lau Komiti ia mo le tapenaga foi o lenei Lipoti. E vaavaai atu foi i le faasologa o galuega ia e tele lava Lipoti a lau afioga i le Taitaifono ma lau Komiti o lo o faasolosolo. Malo onosai, e le faigofie foi tiute o le tulai ma faaleo lagona o le Komiti aemaise foi o iugafono.

Ae lau afioga i le Fofoga Fetalai e agai lau faafesili i tulaga ia o le Inisiua ona o le tasi lea o vaega o le Inisiua o le soifua o tagata Samoa. Ae o lea ou te faitau atu e pei e faamamafa i tagata faigaluega. O le faafesili i lau afioga i le Taitaifono pe agavaa ia le tagata fai Inisiua e kava e le Inisiua ia togafitiga ia po o le pasese foi o le tagata fai inisiua e malaga ai I fafo? Ona ou te iloa a fai o le Inisiua e tatau ona kava uma mea ia togafitiga, talavai, pasese e malaga ai i fafo? Ia o le faafesili pe kava uma e le Inisiua lea ia aua o le soifua. O le soifua o le tagata. Aua e pei o lea lava e lilifa lava ia le inisiua seiloga e tupu se faalavelave ona agai lea o se mafauauga.

O le isi fesili lea e tau maua mai i le saunoaga a le Taitai o le Itu Agai o Inisiua a Alii ma Tamaitai Leoleo o lenei Matagaluega. O le tele lava o inisiua a leoleo, e maua foi e na o le tipi lava i tai i le MOF, ae e le o vaai lava nai leoleo i tulaga o nei Inisiua. O fea o fai i ai? Ae pe o lea foi e tipi e le vaega lea? Ae na ona faafesili atu lava pe faamalamalama mai le vaega lea ona e tuufesili foi ia le mafauau i le inisiua pe tatau ona faamalosia ia Inisiua o Alii ma Tamaitai Leoleo? O latou lea o lo o tutu aua le saogalemu o Samoa. E le faagaloina lea faalavelave lea na tupu mai i se tasi o afafine o le atunuu, faafuasei ona faamavae le mafutaga ma matua ma aiga.

Ia ae afai o faamalosia ia le Inisiua, ia o le aoga tonu lava lea aua o le leoleo, ia ou te tau mama atu lava o le ao ma le po, po ma le ao pe matagi pe afa, e savali lava le leoleo e fai ona tiute. Pe faafesagai foi ma faafitauli, e le solomuli le leoleo. E tatou te tofafa uma ma tou afioga, ia o la e galue lava le leoleo i lona tulaga faatiute. Ia o le tulaga lena e fautua atu ai, pe le ono faamalosia ia lea vaega inisiua o nai alo ma fanau o le atunuu po o tamalii foi ma failauga o lo o galulue i lea vaega o le atunuu.

Ia o le isi faafesili lau afioga i le Taitaifono, i le tulaga lava lea o inisiua mo fanau. Ia o lea e pei ua faapisinisi nisi taimi i tatou inisiua. Ua taugata foi inisiua ia e na o le 2 i le 3 toe alu atu fai mai ua uma le taimi o lau policy na fai. Pe le tau faafaigofie mea faigata o lea e maua o lo o teu i fafo tupe, ia pe i ai se faamoemoe e faaauau ni mea faafaigofie mo le atunuu?

Ia o se manatu lea o lenei usugafono lau afioga i le Fofoga Fetalai, e tauala atu i le afioga i le Taitaifono, faafetai.

**FOFOGA FETALAI:** Malo, saunoa mai i le sui usufono mamalu mai i Salega Nu.1. Ia, ua matau atu ua leai se tasi o sui usufono. Ia tulai maia lau afioga i le Taitaifono.

**Afioga FALEOMAVAEGA TITIMAEA TAFUA:** Ia malo faafetai, momoli atu le faamalo i fesili na tuuina mai. Amata atu i le Taitai o le Itu Agai, amata i lau fesili i tulaga o tatou seila, tatou vaega ia o seila o lo o galulue i luga o vaa. Ia e faamauina e ova i le 400 seila ua maea ona kava ia latou soifua. O le tulaga lea tau inisiua o seila i vaa ona tatou see mai i le fesili lea e te fesili i tatou Investments ia e agai i le NPI, CSL ma le UTOS.

Mo le silafia e lau afioga, o tulaga masani lava lea o tatou vaega nei. E le se mea fou nei, ua leva ua ova ma le 5 tausaga talu ai sa vaevae ai lava seleni e invest i totonu o tatou faletupe nei. O lea e te fesiligia ia tatou seleni uma nei, o lo o faapena ona lelei e pei ona na maua mai i lau saunoaga o lo o lelei uma ia seleni nei o lo o invest i faletupe nei e 3. Ae seivagana ai ia le Samoa Marine Cable, po o maua ai se return. Ia o lo o faapena ona maua dividends pe a oo mai i le Tala o le Tupe o lo o faagasolo nei e maua mai se tali i le tatou Fonotaga i le lumanai, ma le agaga faaalalo. A le ao lena ia tuu atu i le Minisita e maua mai ai se faamalamalamaga o dividend e maua mai i le tatou Samoa Marine Cable.

O le tatou Inisiua, o le vaega lea o tatou premium ia e fai i fafo BNZ i Ausetalia, e pei lava foi ona ou taua, o vaegatupe uma nei, e ala la ona invest i tatou faletupe nei, ona e iai lona taua e maualuluga ia latou tului. O lea ua o tatou o iai e ave iai ia le tatou 1.6 Investment i le BNZ, e maualuga ia le tatou seleni o lo o maua mai ai.

E pei lava ona ou taua e le fou ia vaegatupe ia e teu i fafo. O le tatou \$150,000 lea e nofo i Niu Sila, ia e faaagaga lava e faaauau ai ia tatou policies foi lea e \$150,000 lea e tuu i Ausetalia, ona faapena ona manino lelei, ma lelei lona vaaia e fesoasoani i le faagasologa o tatou tupe foi ia e teu i fafo lea e i ai le tatou tupe lea e \$150,000 lea e teu i Ausetalia.

O fesili a lau afioga Fepuleai, i tatou inisiua o tatou tagata Samoa ia pe kava pe a gasegase, malo manaia le fesili. O le tulaga o le tatou inisiua, a faapea e fai lau pe atoa loa le 6 masina talu ona tipi lau inisiua, ia ona maua lea o lou avanoa e te nono ai lau tupe, e totogi ai lou pasese ae taatia le isi vaega e kava ai oe. E manatua oe o tulaga lea, e le mafai ona e totogi nei lau inisiua, ona e mafaufau lea e mafai ona e toe alu e aumai se pasese i totonu o lau inisiua.

E faapena uma lava i so o se faletupe po o vaega uma lava e muamua lava fai lau... e tai pei o sau investment lea e te alu e inisiua ai lou soifua. O le umi la na teu lau seleni, ia o le tele foi lena o le aofai o le tupe e mafai ona e loan mai ai, e fai ai lou pasese ma fai ai ou pepa malaga i fafo o tatou vaega.



Ia o le isi au fesili i tatou leoleo Samoa, ia o au foi le isi tagata na fesili i le vaega lea, fesili i le vaega lea o inisiua a leoleo ua leva ona tau, leaga talu ai nei na aafia ai foi se tasi ou te masani lelei i ai, sa ou fesiligia i le tulaga o le inisiua e pei ona e fesili ai. E le i lelei foi ona aumai se tali e le afioga i le Minisita, ae se i oo se taimi atonu e oo atu iai ua faamanino atu lea e le Minisita le tulaga lea.

O tamaiti aoga, manaia le saunoaga a lau afioga. I tamaiti aoga lava ia, e le o faamalositia ae pau le mea e fai e tatou i le faalauiloa, ia logo atu iai i le taua o le fai o inisiua a tamaiti. Ioe aua e pei o matua lava ia e lelei ma mataala, o le latou galuega lea e fai inisiua a latou fanau aua o la ifo le tamaitiiti, ia o la e iai lana inisiua e kava ai na ia o le soifua o lona ia agai i luma. Ia aua o mea ia mo tatou matua, o le tatou investment ia mo tatou fanau. E tatou te tilotilo mamao ai e invest ai ia tatou tupe e inisiua ai alo ma fanau mo le agai i luma. E ola ifo foi latou o la na fai galuega a matua mo tatou fanau aoga.

Ia e pei o le tulaga lena, a iai nisi fesili e le o faamalositia le tali, ia o le a tali faauma atu e le Minisita. Ma le agaga faaaloalo lau afioga i lau afioga i le Fofoga Fetalai.

**FOFOGA FETALAI:** Malo saunoa i lau afioga i le Taitaifono. Ia se i tulai mai lau afioga i le Minisita.

**Afioga Hon LEOTA LAKI LAMOSITELE:** Ia faafetai mo le avanoa. Ia faafetai atu foi i lau afioga i le Taitaifono ma le mamalu o le Komiti i le taumafaiga atu foi o ni tali e tusa ai foi ma le faafesili mai foi a le mamalu o tatou sui usufono.

O lea la e avatu ai le talosaga i le tatou Komiti Faatonu, i le tatou Komiti ina ia se i toe tagai ifo i faafesili ia i Investments ia o lea o lo o aumai i i, ona o lea ou te tilotilo atu pe o tausaga lava ia e 2 pe 3 talu ai. Ae ou te iloa e tatau ona iai se tala lata mai ina ia mafai ai ona silafia e sui usufono mamalu o le Palemene le tulaga o lo o taatia ai ia faamatalaga o tatou Investmenta ia a le tatou Faalapotopotoga, aemaise ai la ia Investments ia o lo o taua i lalo i i, ou te talitonu ai o lisi uma i lalo o tatou faamatalaga o le Tupe e pito lata mai, e manaomia la le toe maua o se faamatalaga faapea ina ia mafai ona manino ia faamatalaga ia i sui usufono mamalu. Ia aemaise ai lava ia le Samoa Marine Cable lea o lo o faafesili mai pe o le a se tulaga o i ai? Ia faafetai mo le toe faafesili mai ina ia mafai ona toe faamalamalama atili ia mataupu ia.

Ae o lona aotelega lava i le tulaga o lo o taatia ai ia le tatou Faalapotopotoga, o lo o iai ia mataupu ia o lea e ao ona toe tilotilo iai le Komiti Faatonu i lona faagaioiga, aemaise ai lava la ia le faafaigaluegaina o Investments ia ua faataatia mai. Ia e ono tatau ona toe taumafai e toe fai faalelei ni cost benefit analysis pe a faapea o iai ni fuafuaga o ni Investment e fai i le lumanai ina ia faamautinoa ai o la e puipui lelei Investments ia, aemaise pe a faapea ua i le tatou lalolagi nei i le uncertainty o lo o iai. Ia e tatau ona identify faalelei po o a luitau

Commented [KE1]:

lea o le a i ai ae pe faafefea foi ona puipuia luitau ia ina ia aua ai ne i fesuisui ai tulaga o taatia ai ia galuega o faatino. Ia aemaise foi lava i le tulaga lea mo mea o nonogatupe ia o taua mai faapea o lo o iai foi ia nai faafitauli i le le totogiina.

Ia o le mea masani lava ia i le tele o faletupe, ae e ao foi i le Pulega ona toe tilotilo faalelei, i le manage ina o portfolio ia, ina ia taumafai e faapaleni, ia aua ne i see tele ia le nonogatupe faapitotasi, i se auala e tasi lava se suiga o le siosiomaga o lo o faagaioi ai ona faapea loa lea ona pagatia.

O lea foi o lo o taua mai ai i i fesuaiga o mea ia o tupe sui o foreign exchange, ia tasi lona vaega e ao ona toe silasila i ai tatou ina ia mafai ai ona faatino ma le totoa ia le faatinoga o galuega ia. O lo o iai nai faamaite fou ia e tau tilotilo atu iai o se avanoa e mafai ai e le Faalapotopotoga ona tilotilo agai i luma i se faigapaaga ma se faletupe mo nonogatupe laiti ae faamauina foi e le vaega lea o le Insurance Scheme.

Atonu o se mea e tilotilo mamao iai mo le lumanai aemaise o faigapaaga ma le faletupe lea o lo o iai le Development Bank aua e lelei lana outreach i tua i le communities. O lona uiga la e mafai ona faipaaga foi ma Fono Faavae ina ia mafai ai ona maua nonogatupe e nono agai i tua i tatou communities ae faaoga le Insurance Cover e guarantee ai ia le loan. O se mea faapena o nai initiatives ina ia mafai ai ona tele atu ia le participation aua o lea ua ou vaai atu foi iai, o lea e faapea mai ia le faamatalaga, e iai lava ia le aia a le tagata e fai ai lana filifiliga i le faatinoga o lana Insurance. O lona uiga la, e ao i le tatou Faalapotopotoga ona taumafai e tilotilo i ni auala e mafai ai ona introduce nisi mea, nisi auaunaga fou. O ni auaunaga e iloa e mafai e tagata ia ae siitia ai foi ma lona tamaoiga. E pei o se vaai atu lea o se vaaiga i lona aotelega i le tulaga o taatia ai ia le Faalapotopotoga. E le gata foi i lona, ae o le tulaga i le vaaia o galuega fuafua mo le lumanai.

E momoli atu le faafetai ma le faamalo i le Faalapotopotoga i le Komiti Faatonu ma le Pulega, e tusa ai ma le faatinoga o latou galuega. O se faamatalaga lea i lenei itula, faafetai.

**FOFOGA FETALAI:** Ia malo faafetai saunoa i lau afioga i le Minisita aemaise foi o le faamalamalamaina atili o Tali a le tatou Malo aua nisi itu taua e pei ona laga e sui usufono mamalu o le Maota.

Ou te tapa lau afioga i le Taitaifono mo le lafo.

**Afioga FALEOMAVAEGA TITIMAEA TAFUA:** Lau afioga i le Fofoga Fetalai ou te faatu le lafo, *Ina ia faamaonia e le Fono Aoao le P.P.2022/2023 Nu. 19, Lipoti a le Komiti o Tupe Maua ma Tupe Totogi i le P.P.2020/2021 Nu. 97 ma le P.P.2021/2022 Nu. 62, Lipoti Faaletausaga a le Faalapotopotoga Inisiua Tau Soifua a Samoa mo Tausaga Faaletupe 2019/2020 ma le 2020/2021.*

*Faaluaina e le sui usufono mamalu mo Lefaga ma Faleaseela, sui usufono mo Safata 2 ma le sui usufono mo Aana Alofi 1.*

*Na faamaonia le lafo.*

**FOFOGA FETALAI:** Ou te tapa lau afioga i le Minisita mo le lafo i le Tali a le tatou Malo.

**Afioga Hon LEOTA LAMKI LAMOSITELE:** Lau afioga i le Fofoga Fetalai ou te faatu le lafo, *Ina ia faamaonia e le Fono Aoao le Tali a le Malo i Fautuaga a le Komiti o Tupe Maua ma Tupe Totogi, e pei ona ou tolaulauina.*

*Faaluaina e le Minisita mo le Soifua Maloloina ma le Minisita mo Leoleo ma Falepuipui. Pulega o Tinei Mu ma Faalavelave Tutupu Faafluasei.*

*Na faamaonia le Tali a le Malo.*

**P.P.2022/2023 NU. 20, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU. 107 & P.P.2021/2022 NU. 43, LIPOTI FAALETAUSAGA A LE KAMUPANI O PULEGA A LE FAAPUTUGATUPE TEUFAAFAIGALUEGA O MAVAEGA TAUSI A SAMOA MO TAUSAGA FAALETUPE 2019/2020 & 2020/2021.**

**P.P.2022/2023 NU. 81, TALI A LE MALO I LE P.P.2022/2023 NU. 20, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU. 107 MA LE P.P.2021/2022 NU. 43, LIPOTI FAALETAUSAGA A LE KAMUPANI O PULEGA A LE FAAPUTUGATUPE TEUFAAFAIGALUEGA O MAVAEGA TAUSI A SAMOA MO TAUSAGA FAALETUPE 2019/2020 ma le 2020/2021 - ILOILOGA**

**FOFOGA FETALAI:** Tulai mai lau afioga i le Taitaifono o le Komiti o Tupe Maua ma Tupe Totogi.

**Afioga FALEOMAVAEGA TITIMAEA TAFUA:** Lau afioga i le Fofoga Fetalai, ou te faatu le lafo, *Ina ia faautagia e le Fono Aoao le Lipoti a le Komiti o Tupe Maua ma Tupe Totogi, o lo o tuuina atu ai ana Saililiga, Fautuaga ma Iugafono.*

*Faaluaina e le sui usufono mamalu mo GagaiFomauga 2 ma le sui usufono mo Aana Alofi 1.*

*Na faamaonia le lafo.*

**FOFOGA FETALAI:** Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

**Afioga FALEOMAVAEGA TITIMAEA TAFUA:** Faafetai i lau afioga mo le avanoa. O sailiiliga a le Komiti ia ma lona aotelega. O le faamoemoe autu na faavae ai le UTOS, o le tuuina atu o avanoa mo tagatanuu uma o Samoa, e latou umia ai sea i Kamupani ma Pisinisi Tumaoti e teu faafaigaluega ai ia latou tupe, ma maua mai ai ni tupe faasili ma nisi faamanuiaga.

O le Kamupani ua patino lava la latou matafaioi, i le tausia lelei ma faafoeina o tupe ma aseta, a le Faalapotopotoga tau tupe Teufaafaigaluega a Mavaega Tausi a Samoa po o le UTOS Trust. O le Lipoti Faaletausaga 2019/2020, na faamauina ai tupe maua a le UTOS, e \$1.9 miliona. Ae \$1.4 miliona ana tupe faaalu i lea Tausaga Faaletupe. O le 2020/2021 na faamauina ai le \$2.1 miliona Tupe Maua, ae \$1.6 miliona ana Tupe Faaalu i le 2020/2021.

Aotelega o Tupe Maua ma Tupe Faaalu 2019/2020 ma le 2020/2021 e \$482,160,000 Tupe Maua a le Pulega i le 2019/2020 ma na siitia i le \$93,355 pe a faatusa i le \$575,522 Tupe Mama o le 2020/2021. Na mafai e le Pulega ona totogi atu le \$97, 036 i le Malo mo saofaga, dividends i masina muamua e 6 o le Tausaga Faaletupe 2020/2021.

O Itu taua na faamauina e le Komiti. Sa tapa e le Komiti se faamalamalamaga a le Pulega e uiga i le nonogatupe ma le Samoa Airways lea e iai le \$207, 829 le aofai o totoe. Na taua e le Pulega, o lenei nonogatupe, na amatalia mai i le 2018 i lalo o se maliega a le UTOS ma le Kamupani Vaalele aemaise o lona faaaogaina. E \$15 miliona na uluai amata ai ia lenei nonogatupe ma e 6.9% le tului, e ese mai i le 1% o le tau faaee atu po o le service fee sa tuuina i ai e le Pulega.

O lo o faamauina i faamatalaga o le Lipoti, le aofaiga e \$150,000 le vaegatupe e tatau ona totogi muamua mai i le Pulega, ona faamatuu atu ai lea o le nonogatupe e pei ona taua. Ae peitai, ona o le tulaga sa iai le Kamupani Vaalele, na tuu iai e le Pulega le avanoa e togitogi mai ai lenei aofaiga e \$150,000 faakuata mo le 10 tausaga. I le faatinoina o lea tuutuuga, na taua ai e le Pulega se isi feagaiga e faaaogaina ai e le Pulega nei tupe totogi, mo le faalauiloa a le Kamupani Vaalele, e ala i pepa Malaga po o tickets, ma e toe tuuina atu tupe o nei faalauiloa e fesoasoani i mea tau tupe a le Kamupani Vaalele.

Sa faaalua le popolega o le Komiti i teugatupe a le atunuu o lo o i le UTOS, ao feagai ai le atunuu ma aafiaga o le Koviti-19 i lenei vaitau. Na taua e le Pulega, sa iai le faamoemoe e nofo sauni ai mo nisi o le atunuu, o le a finagalo e talaina ia latou teugatupe, ona o le mafuaaga e pei ona taua. Peitai o le toatele o le atunuu, sa finagalo e toe faaaau le teina o latou tupe, e top up ia latou units ona o ni mafuaaga tatau. Ma

o lea na atagia ai, le siitia o Tupe Maua a le Pulega i le 2020/2021, ona o lea le tulaga, na fai ai loa fautuaga.

**FAUTUAGA:**

1. E fautuaina e le Komiti le Faalapotopotoga, ina ia faia ni polokalame faalauiloa i tagata lautele o le atunuu, i le taua o le faia o faaputugatupe e tua iai. Ma ia mautinoa o lo o saogalemu iunite a le aufai saofaga.
2. E fautuaina e le Komiti ia le Faalapotopotoga ina ia faaauau pea le faamoemoe autu na fausia ai le Kamupani ma silasila totoa i aitalafu tuua, e fesoasoani mai ai foi i le atinae o le atunuu.

**IUGAFONO:**

I le maea ai o iloiloga a le Komiti e fautuaina le Fono Aoao, ina ia faamaonia:

*P.P. 2020/2021 Nu.107, Lipoti Faaletausaga a le Kamupani o Pulega a le Faaputugatupe Teufaafaigaluega o Mavaega Tausi a Samoa mo le Tausaga Faaletupe faaiiina i le Aso 30 o Iuni 2020 ma le;*

*P.P.2021/2022 Nu.43, Lipoti Faaletausaga a le Kamupani o Pulega a le Faaputugatupe Teufaafaigaluega o Mavaega Tausi a Samoa mo le Tausaga Faaletupe faaiiina i le Aso 30 o Iuni 2021.*

Ma le faaaloalo lava lau afioga.

**FOFOGA FETALAI:** Malo. Faafetai i lau afioga i le Taitaifono. Ou te tapa lau afioga i le Minisita mo le Tali a le tatou Malo.

**Afioga Hon LEOTA LAKI LAMOSITELE:** Faafetai mo lou avanoa. O le Tali atu a le Malo, Lipoti a le Komiti o Tupe Maua ma Tupe Totogi, e faatatau i le Lipoti Faaletausaga a le Kamupani o le Pulega o Faaputugatupe Teufaafaigaluega o Mavaega Tausi mo le Tausaga Faaletupe 2019/2020, ma le 2020/2021.

**FAUTUAGA 1:**

E fautuaina e le Komiti le Faalapotopotoga, ina ia faia ni polokalame faalauiloa i tagata lautele o le atunuu, i le taua o faia o faaputugatupe e tua iai. Ma ia mautinoa o lo o saogalemu iunite a le aufai saofaga.

**Tali:**

O lo o i ai polokalame faalauiloa a le Malo o lo o faatino e le Kamupani e aofia ai faalauiloa i luga o Televise, leitio faapea foi

luga o upegatafailagi. E iai foi polokalame e faia i Salafai i tausaga taiatasi. E le gata i lea, ae o le tausaga nei, na amata ai ona faia folasaga a le Pulega mo tagata ia e Malaga atu mo galuega faavaaitaimi, ina ia faia ia ni a latou teugatupe e tua iai pea pe a maea ia latou konekarate.

E iai le manatu o le Pulega, e ui o lo o faia pea ia nei faalauiloa, ae toatele lava o tatou tagatanuu e le o silafia ma malamalama i auunaga a le UTOS. O lea e talia ai le fautuaga a le Komiti ma o lo o iai fuafuaga e savalia itumalo taitasi e fai ai le faalauiloa ia ogatasi ma fuafuaga faataatitia a le Malo, i itumalo taitasi. O le tasi vaega e taua i le tauaveina o le galuega a le Pulega, ia mautinoa o lo o saogalemu teugatupe a le aufai iunite. O lo o iai taiala ua uma ona tapena e fua iai ma mataitu lelei ai le teu faafaigaluegaina o tupe a sui faaiunite, ina ia aua ne i iai se tulaga e ono lamatia ai ia latou tupe.

## **FAUTUAGA 2:**

E fautuaina e le Komiti ia le Faalapotopotoga ina ia faaauau pea le faamoemoe autu na fausia ai le Kamupani ma silasila totoa i aitalafu tuua, e fesoasoani mai ai foi i le atinae o le atunuu.

### **Tali:**

E faamauina e le Pulega fautuaga a le Komiti ina ia faaauau pea le faamoemoe autu na faatu ai le Kamupani. O le a vaavaai foi i aitalafu tuua aua le fesoasoani atu i atinae o le atunuu ma le sologa lelei o le tamaoiga.

O isi mataupu e talosaga atu ma le faaloalo, o lo o iai ni Vaega o le Lipoti a le Komiti e fia faia iai ni faasaoga ina ia manino ai faamaumauga a le Komiti faapea le Fono Aoao Faitulafono.

Muamua, o le Vaega 5 upu tomua, laina 2, o lo o iai le faaupuga UTOS Trust, e talosagaina pe mafai ona suia i le UTOS Management Limited. O le FaaPeretania lea o le Kamupani o le Faaputugatupe Teufaafaigaluega o Mavaega Tausi a Samoa e pei ona faamatalaina le Vaega. O lo o tau fenumiai Faapotopotoga e 2, i faamaumauga o lo o tuuina mai. A talia e le Komiti, e mafai ona faaogaina, le fetuunaiga o faamatalaga ua saunia e le Pulega mo le Palakalafa muamua, Vaega 5 e pei ona tuuina atu i lalo o le Faaputugatupe Teufaafaigaluega o Mavaega Tausi a Samoa (UTOS), Faaputugatupe sa faavaeina i lalo o le Tulafono Faaputugatupe Teufaafaigaluega o Mavaega Tausi i le 2008.

O lo o aofia i totonu o lenei Tulafono se aiaiga e ao ai ona i ai se Pule mo le Faaputugatupe uma taitasi Teufaafaigaluega o Mavaega

Tausi. O lea na faatuina ai e le Malo le Kamupani o Pulega o Tupe Teufaafaigaluega o Mavaega Tausi o Samoa le UTOS Management i lalo o le Tulafono o Faalapotopotoga a le Malo 2001, na te faafoeina ma pulea le Faaputugatupe Faafaigaluega o Mavaega Tausi a Samoa o le UTOS Trust e pei ona aiaia foi i pepa faamaonia o Feagaiga o le Trustee ua sainia ia Iulai 2010.

Vaega 6.5, o isi mataupu palakalafa 3, o lo o faamauina ai le nofo lisi o le Pulega i le Faletupe Tutotonu o Samoa, e fia faasao lea vaega i le Faletupe o Atinae o Samoa lea o lo o faapea ona i ai le Ofisa o le Kamupani i le taimi nei.

Ma le faaloalo lava, faafetai.

**FOFOGA FETALAI:** Malo, faafetai i le saunoaga a lau afioga i le Minisita mo le tolaulauina foi o Tali a le tatou Malo e tusa ai foi o le Lipoti a le tatou Komiti. Ia ua avanoa ia le tatou Maota.

Tulai mai lau afioga i le Taitai o le Itu Agai.

**Tofa Hon LAUOFO FONOTOE NUA FESILI PIERRE LAUOFO:** Faafetai i lau afioga i le Fofoga Fetalai. O lea lava e faamalosia atu toeitiiti lava iu ia le tatou Fono, ae malo faafetai.

Ua faafetai i lau afioga i le Taitaifono mo le Lipoti. Faafetai foi i lau afioga i le Minisita mo Tali a le Malo. E faamauina foi le faafetai i le Pulega ma le Komiti Faatonu o le tatou UTOS. Ia e le na ma le laina le taua tele foi o lenei Faalapotopotoga i totonu o le atunuu aemaise foi o isi Faalapotopotoga aua o lea foi e fesoasoani le UTOS I isi foi Faalapotopotoga a le Malo e nono atu ai ia tupe ia aua le faagaioina o latou foi atinae.

E faamalo faafetai o lea e maua i le Lipoti ia o lo o maua foi ia tupe faasili. Ia e le o iai lava ia se Faalapotopotoga o faaletonu, o lea lava e matau atu o lea o lelei lava. Ia o le taimi tonu ia faatoa tau amata ia le Koviti. O lea lava e matau o lelei le faasologa mai i lena vaitau, ae faafetai o lea ua maua le tali a lau afioga i le Minisita, o lea e i ai le faamoemoe e savalia ia afioaga ma itumalo i tua. E faamalamalamaina o le tatou Faalapotopotoga nei ia aua foi nisi o afioaga i tua o fia teuina ia ni latou tupe e faafaigaluega i totonu o le UTOS.

Ia ae talu ai o lau afioga o le Minisita o lo o faaluulu iai le tatou Polokalame foi lea o le Miliona, e fesili atu ai ma le faaloalo, e mafai ona invest se vaega o lena tupe i totonu o le UTOS? E teu faavaitaimi ai foi lea e faafaigaluega ai, pe vavae ifo ai sina \$200,000, pe fia? Se mea e mafai ona, ia ona teu ai lea i ina, o a ni vaega seleni e mafai ona maua mai ini tului, ia ona faapena lea ona faaoga e nai itumalo. Ia aua mo le agai i luma, o lea ou te talanoa atu i le sustainability o le Poloketi lena, ia ua fetau lelei lava aua o lea ua talanoa mai lau afioga i le UTOS, ia masalo ai o le faamoemoe lena. O le tali lea ua aumai o le a savalia

afioaga i tua i faalauiloa, ia ma toe aumai ni seleni na e invest i totonu o le UTOS.

O le fesili lau afioaga i le Taitaifono, Komiti e tasi lava le fesili. Na o le Expenditure, Board Expenses, Management Compensation \$660,000. O le a se faamaninoga o lea tulaga? O lea sa faaoga e totogi ai expenses a le Board, a o le Komiti Faatonu.

Ia lau afioaga i le Fofoga Fetalai, ia faafetai mo le avanoa.

**FOFOGA FETALAI:** Ia malo, faafetai mo le... fesili a lau afioaga i le Taitai o le Itu Agai.

**Afioga Hon Valasi Luapitofanua Toogamaga Tafito Selesele (Minisita mo le Soifua Maloloina):** Lau afioaga i le Fofoga Fetalai...

**FOFOGA FETALAI:** Ia se i tulai mai lau afioaga i le Minisita o le Soifua Maloloina...

**Afioga Hon Valasi Luapitofanua Toogamaga Tafito Selesele:** O se mea e fia fesoasoani i le Taitai o le Itu Agai ma le faamaninoga a le afioaga i le Minisita. O le vaiaso leni o la e taamilo ai le vaega lea a le UTOS i le matou itumalo. Sa fai foi ananei ia le Semina, o la la ua i tua mo se faamaninoga. Ae faaetai e pau lena o si mea e fia fesoasoani atu ai.

**FOFOGA FETALAI:** Ia malo, faafetai, ia se i tulai mai lau afioaga i le Taitaifono, o lea ua matau atu ua malilie uma sui usufono i lau folasaga.

**Afioga FALEOMAVAEGA TITIMAEA TAFUA:** Ia malo faafetai, faafetai atu i lau Afioga i le Taitai o le Itu Agai. Faafetai mo le... o na lava e te momoli mai le faamalo ma le faafetai i le tatou Kamupani o le UTOS. O lo o matauina lava e moni lava lau saunoaga, o lo o faapena lava ona maua le tupe mama i so o se Tausaga Faaletupe.

Ae o le tulaga i lau fesili muamua, ia o le \$200,000 foi lea o le vaega o le Miliona, ia o le a tali atu ai le Minisita. O le tulaga lea e pei ona e fesili ai, o le a tuu atu i le Minisita e pei o ia tonu lea e sau ai le I ma le leai o le tulaga lea e pei ona e taua. Ae e le i tali atu le Minisita, ao lau foi vaai iai, e ese le manaia o lea vaegatupe e fesoasoani i nai tupe pe a maua se interest e tufa foi i le itumalo pe a oo ina lata ina maea le... manaia lau fesili ae se i tuu atu pea i le Minisita aua a io mai i le Minisita, ia ailoga e iai se itumalo e le teuina se latou \$200,000 e maua ai foi se vaeveaga ia aua e ese mai i le matou itumalo, o le matou itumalo e ave lava le tupe a le afioaga ia, ia ma ave ai le fautuaga i le



tupe e o e tuu I totonu o le UTOS. Ae o lea e maua nei le tali nei pe a tali atu ia le afioga i le Minisita.

Ae o le fesili a lau afioga I le Expenditure lea e \$660, totogi o le Pulega, 4 Managers, e 5 Director ae faaalu ai le seleni lea e fesili ai. Ia e le i maua lelei pe se fesili lea na tulai mai ai le afioga, leai, masalo e na o le pau lea lau afioga o fesili na tuuina mai. Ae ou te iloa o le finagalo o se tali, e le gata i lau afioga, o le a faapena foi le tele o sui usufono o le a faalogologo i le tali a le afioga i le Minisita. Ma le faaaloalo lava faafetai.

**FOFOGA FETALAI:** Se i tulai mai lau Afioga i le Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Ia faafetai mo le avanoa, ua ou tulai atu ae le i saunoa mai le afioga i le Minisita, e momoli atu le faafetai i lau Afioga i le Taitai Komiti mo le lagolagoina o se manatu faatu atu. O lea ua faafofoga le afioga i le Minisita, ua talia lelei e lau afioga i le Taitaifono o le tatou Komiti. O lea foi ou te vaavaai atu i le tatou Maota, ua matua fiafia ma soisoi uma sui usufono. Ia saunoa maia lau Afioga i le Minisita.

**FOFOGA FETALAI:** Saunoa mai lau Afioga i le Minisita.

**Afioga Hon LEOTA LAKI LAMOSITELE:** Ia faafetai mo le avanoa, ia faafetai foi mo mataupu o lo o laga mai tatou sui usufono e tusa ai foi ma le faatalatalanoaga o le UTOS. O le faitau atu i le lipoti a le Kamupani, o le faamuamua la e aumai, o le tamaoaiga, ina ia lelei le tamaoaiga o i latou ia o units holders. Ma a faapea o le agaga lea na taumafai ai e aumai le finagalo o units holders ina ia fai a latou teugatupe i totonu o le Kamupani, e tataua la ona i ai se faasiliga lelei, o se vaegatupe faasili lelei e maua e i latou ia, po o le au faisea foi, pe a faapea e uma le vaitaimi. E tai pei o le tausaga ona faapea lea, o lea ua maua atu le tatou kivi lea. O lau matau atu i ai, e le i iloga ona tele se kivi a le UTOS, talu ona amata. Ae faasao mai au, ae ou te masalo a tele o le sefulu, sefulu pasene. Ae faapea o le fitu lava le numera silia lea o lo o i ai nei, e tilotilo i ai le Malo i aga returns ia e maua mai i latou Kamupani e pei o SOEs lea e i ai. A faapea la o au lea e tuu lau tupe i totonu o le UTOS ae faapea e sefulu pasene le return, ona ou tau fesili lea, pe na o le pau lea, pe i ai se isi mea e i luga atu o le sefulu pasene. Aua o le tele ia o faatusatusaga o le mea lea faapea, a e alu i le bank e fixed deposit lau tupe, ia a le lima pasene pe fa pasene lau tupe e maua ai. Ae a e sau e teu i le UTOS e maua la lau sefulu pasene. Ae manatua foi o le eseese o mea ia, o au lea e invest i totonu o le Kamupani lea e faataavale e le afaigaluega, e ese mai i le tagata le e sau e teu lana tupe i le bank aua o la e i ai le puipuiga, le puipuiga la e i ai, e tele le avanoa, i so o se taimi lava e te manao e aumai lau tupe, ma

tulaga faapena. Ae a invest i i, e i ai le avanoa e ono gau ai le Kamupani, ona faaetonu loa lea o oe.

O faaeteetega na, a faapea o lea ua aumai le faamatalaga e ave le faamuamua i tatou unit holders, o lona uiga o la e aumai le faatuatuaga o unit holders ia tatou le Kamupani, ina ia maua atu se return pitosili ona lelei mo latou. O le mea lena, e lead agai i ai i le isi fesili lea na faapea mai, i le mea lea pe mafai ona ave e invest i totonu i i, a tatou tupe ia. E faamoemoe le tali, i lau tilotilo i le performance a le Kamupani la e i ai. A faapea la e fai se faaitaitai, a avatu a o lea sa borrow ai le Samoa Air lea, o lea la ua faaetonu, mo au lava ia. Ou te le o mafanafana pe a ave lau tupe e teu ai i i, i le Kamupani lea, ona sau lea o le isi tagata avatu le tupe gau, ma gau atu ai loa ma le Kamupani lea, ona ou gau atu ai foi lea ma au. E pei o le vaaiga lena faaletagata foi lele i le mataupu lea, e ala ai ona ta mafaufau faalua, pe faatolu foi, pe ave lau tupe lea e invest ai i i. O lea e aumai le guarantee a le Kamupani, e leai e mautinoa lava e maua lau return i totonu i i. A o le mea lea e tau autilo atu i ai, o e maximise ina o lau investment ina ia taumafai ia feololo sina au tupe faasili e maua mai ai. Aua o le agaga lena, ma le isi mea, o le malupuipua o lau investment, ta te iloa o la e mautinoa e toe maua mai. Ae ui i lea, o lea e matau atu lava, o lo o aumai ia le assurance a le Kamupani i le agai i luma, o i ina lea e i ai lo ta mafaufau, se i mataitu po o faapei le aluga o lo o i ai.

Ae mo le taimi nei, o lea ua i ai le faitalia o tatou fonofaavae, e mafai ai ona latou invest i i, i le UTOS. Ou te iloa ua i ai ia le Fonofaavae o la ua ave i ai se vaega o le latou tupe e invest ai. O lona uiga la, o lea e faalogologo mai le UTOS, afai o le Fonofaavae muamua lea o lea ua ave le latou 50,000 e teu faavaitaimi i ina. O le tatalo i le tatou Kamupani lea, o le a avea le fonofaavae lea ma faaitaitaiga muamua, pe o le a se tilotilo atu i ai. O isi Fonofaavae, o la e ave le latou faamuamua i latou atinae, la ua uma ona tuu i lalo o latou fuafuaga alualu mamao ma latou fuafuaga ia e fai faaletausaga lea e maua ai le miliona. Ona o le tele o a latou atinae la e mananao e fia faatino i le taimi lena. Aua e manatua foi, a ave la outou 50,000 i totonu i i, e invest ai mo se tausaga pe 2 tausaga, o la la ua noatia ai i totonu i ina ia le tou tupe lea, ua le mafai ona e toe tago atu i ai pe a e mana, ona e i ai foi aiaiga o tuutuuga o le toe faafoi mai o le tupe ma tulaga faapena. E ao foi la i fonofaavae ona taumafai e fuafua lelei ina ia mafai ai ona lava le latou faasoia i le vaega lea ne i te i ua toe aapa atu e aumai le latou tupe a o lea faapea mai, o le aofai lea o le tou sala, e le mafai ona maua uma atu ai le tou tupe ona o lea ua uma ona fai tatou tuutuuga. Ae le faapea la e le mafai ai, o lo o i ai le faitalia i fonofaavae i le latou silasila i ai i le vaega lea.

O lo o taumafai atu le fautuaga foi i le tatou UTOS, ina ia silasila totoa i ai, e le tataua ona aua ne i tupu tele mai mea ia o faiga nogatupe aemaise foi lava i isi itutino o le tatou Malo ae le o lelei le totogiina maia. Aua o tagata ia e ona tupe, e le o le Malo e ona tupe, o tagata

taitoatasi. O le tele o Ekalesia, aulotu ma faalapotopotoga, o tagata taitoatasi, o lea ua aumai le latou faamoemoega e ave i le kamupani e maua mai ai le latou return lea. O lona uiga, e tatau i le kamupani ona fuafua lelei le feasibility studies ma fai faalelei suesuega ae le i avea le loan, ina ia mafai ai ona ave ma le mautinoa e totogi mai le aitalafu ma maua mai ma le return lea e tele ina ia mafai ai ona maua le tufatufaga tupe lea o lo o i ai i totonu o le UTOS, lea e maua ai e unti holders a latou faasiliga.

O lo o lagolagoina lava le galuega faapaaga ma le UTOS i le agai i tua. O lea e faamalo atu ai i le Pulega i a latou fuafuaga ia e faapea e o ai i tua i tatou fono faavae, ae o lo o avatu ai foi ma le faamalosiau ina ia faamalamalama lelei i tatou fono faavae ma tagata taitoatasi i totonu o itumalo i itu uma, i tulaga uma aemaise lava mea ia o luitau pe a faapea e fai lau teugatupe ina ia e malamalama lelei ai ae le i faia lau teugatupe e pei ona fuafuaina.

E momoli atu le faamalo i le tatou kamupani o le UTOS e tusa ai foi ma le latou galuega o lo o faatino mo tatou tatou unit holders faapea foi ma le latou lagolago ua aumai i le Malo i le faatinoga o isi galuega o lo o taumafai foi i ai le tatou Malo. Faafetai.

**FOFOGA FETALAI:** Malo mo le saunoaga a lau Afioga i le Minisita. Ou te tapa lau Afioga i le Taitaifono mo le lafo.

**Susuga Maulolo Tavita Aмоса:** Pe i ai se avanoa faamolemole lau afioga?

**FOFOGA FETALAI:** Ia e faamalie atu o lea ua...

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le P.P.2022/2023 Nu. 20, Lipoti a le Komiti o Tupe Maua ma Tupe Totogi i le P.P.2020/2021 Nu. 107 & P.P.2021/2022 Nu.43, Lipoti Faaletausaga a le Kamupani o Pulega a le Faaputugatupe Teufaafaigaluega o Mavaega Tausi a Samoa mo Tausaga Faaletupe 2019/2020 & 2020/2021.*

Ma le faaaloalo lava.

*Faaluaina e le sui usufono mamalu mo Aana Alofi 1 ma le sui usufono mamalu mo Gagaiformauga 2.*

*Na faamaonia le lafo.*

**FOFOGA FETALAI:** Ou te tapa lau Afioga i le Minisita mo le Lafo a le tatou Malo.

Commented [m2]: a

**Afioga Hon LEOTA LAKI LAMOSITELE:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa o Tali a le Malo i le fautuaga a le Komiti o Tupe Maua ma Tupe Totogi e pei ona ou tolaulauina.*

*Faaluaina e le Minisita mo Galuega, Felauaiga ma Atinae Eeseese ma le Minisita mo Leoleo ma Falepuipui, Pulega o Tinei Mu ma Faalavelave Tutupu Faafuasei.*

*Na faamaonia Tali a le Malo.*

**FOFOGA FETALAI:** Ia, talu ai o lea ua tatou taunuu mai i le tatou taimi manava e tusa ai ma le lafo, ua tatau foi ona fai se tatou malologa. Faafetai tele lava i le paia o le tatou Palemene. E ui lava i le faigata o le faatulagaga o tatou Fonotaga faaumiumi faapenei, ae ua faigofie lava ona o le matau i le faatinoga o a tatou galuega e amanaia tele i lo outou finagalo la outou tautoga i le silasila mamao mo se manuia auiluma o le tatou atunuu. Malo faafetai. O le toatele foi o le tatou Maota ua matutua le soifua, tulou le gagana. Ae ua ou molimauina lava lo outou onosai e faamaopopo le tatou sailiga matagi i le Atua e ala i upufai o le Palemene. Ua outou faaaaogagase i lenei aso, malo faafetai le onosai, malo le usufono. O le a se mea ua lelei oan tatou faia i lenei aso, ia fai lea ma viiga o le Atua.

Faafetai foi i Ofisa Sili o Pulega o Matagaluega ma Faalapotopotoga Tumaoti a le tatou Malo ua matauina lava lo outou onosai aemaise o le lagolagosua a le tatou Malo mo mataupu e fesootai ma outou auaunaga e pei ona aafia i iloilogaga a le tatou Maota. Malo faafetai le tautua atunuu.

E fia faaleo foi se faafetai i le tapuaiga a le atunuu i ona tulaga faalupelupeina, faafetai tatalo, malo le tapuai, ua iu ma le manuia le alofaiva o le Palemene i lenei aso ona o lau tapuaiga. Malo faafetai.

E le faagaloina foi se faafetai i auaunaga eseese o lo o feagai ma le tautua faaauau mo le puipui o le saogalemu o le Palemene i aso Fono taitasi e aofia ai le Matagaluega o Leoleo ma Falepuipui, Pulega o Auaunaga Tau Tinei Mu ma Faalavelave Faafuasei, Matagaluega o Fesootaiga ma Faamatalaga Tekonolosi, 2AP ma le Kamupani a le Cooline. Faafetai mo le auaunaga, faafetai le tautua Palemene. Ua tatau ona fai se tatou malologa. Ia alofagia e le Atua le afifio atu o le tatou Maota, agalelei le Atua ma puipui lo outou soifua i ala o le a agai atu i aiga ma itumalo i lenei afiafi. Tatou talosia le alofa o le Atua i le aso a taeao mo le toe faaauauina o le tatou galuega. Manuia tele lenei afiafi.

Ae tatou te le i tolopo ou te talosaga atu i le sui usufono mo Faleata 1 se i saunoa se tatou tatalo.

*Na tolopo Taulumaga a le Fono Aoaofaitulafono i le itula e 6:04 i le afiafi seia aulia le Aso Faraile, 10 Mati 2023 i le itula e 9:30 i le taeao.*